














白氏文集卷第五十

中書制誥三

舊體十八道

冊新迴鶻可汗文



維長慶元年歲次辛丑四月庚寅朔二十一日庚戌
皇帝若曰唐有天下垂二百載列聖垂拱八荒即敘
舟車之所及日月之所照威綏仁董罔不嚮化惟北
之氣積厚而靈靈發象生生為豪傑義信武烈代為
名王南西東方亦有君長較雄鬪智莫之與京國朝
已來寢漬風澤或効功伐或申婚媾同和協比以託
于今今朕不德禎嗣大統推義布信以初為常矧乎
柔遠申恩睦鄰展禮茲惟舊典垂自祖宗虔奉恭行
安敢失墜咨爾九姓迴鶻君登里羅羽錄沒密施句

主錄毗伽可汗地生奇特天賜勇智英姿所莅雄略
所加諸戎雜虜愛畏柔服風靡山立清寧一方宜人
有土受天百祿時推代嗣實來告予曰予一人實鄰
冊命是用遣使朝議大夫檢校左散騎常侍兼少府
監御史大夫雲騎尉賜紫金魚袋裴通副使朝議大
夫守少府少監兼御史中丞襲魏國公食邑三千戶
賜紫金魚袋賈隣等持節備物冊爲登里羅羽錄沒
密施句主錄毗伽可汗於戲善必有鄰德無不荅此
崇恩禮則彼竭信誠克保大義永藩中夏昭昭天地
實聞斯言

冊迴鶻可汗加號文

維長慶元年歲次辛丑某月朔某日皇帝若曰北方

之強代有君長作殿玄朔賓于皇唐粵我祖宗錫乃
婚媾五聖六紀二邦一家此無北伐之師彼無南牧
之馬兵匣鋒刃使長子孫叶德保和以至今日咨爾
迴鶻君登里羅羽錄沒密施句主錄毗伽可汗義智
忠肅武決勇健天之所授時而後生故東漸海夷西
亘山狄惠寧威制鱗帖草偃聲有聞於天下氣無敵
於荒外而能事大圖遠納忠貢誠請仍舊姻誓嗣前
好朕惟睦鄰是務柔遠爲心既降和親之命遂申飾
配之禮禮物大備寵章有加喜動陰山光增昴宿夫
以迴鶻雄傑如彼慶榮若此雖自貴曰天驕子未稱
其盛雖自尊曰天可汗未稱其美宜賜嘉號以大誇
將來今遣使某官某副使某官某等持節加冊爲信

義勇智雄重貴壽天親可汗於戲釐降展親大德也
進冊加號大名也宜乎思大德稱大名懋哉始終欽
若唐之休命

韋綬從右丞授禮部尚書薛放從工部侍郎
授刑部侍郎丁公著從給事中授工部侍

郎三人同制

勅尚書右丞韋綬等朕在東宮時先皇帝垂慈聖之
德念予冲蒙選端士通儒使講貫今古自禮樂刑政
暨君臣父子之道博我約我日就月將俾予今不至
墻面克荷丕訓大揚耿光實綬放公著之力也故朕
嗣位未逾時月或自郡邸或自省署徵擢寵用爲丞
郎給事官雖超拜職亦俱舉光而心愈讓人爵

貴而心益恭宜更褒升重酬輔導以綬精粹辯博有
先儒之風可作秩宗以放端明慎重行君子之道可
居憲部以公著檢敬規度得有司之體可貳冬官於
戲貞百工平五刑典三禮皆重任清秩予無愛焉蓋
欲表三子道不虛行而明予一人德無不報也綬可
禮部尚書放可刑部侍郎公著可工部侍郎餘並如
故

李諒除泗州刺史兼團練使當道兵馬留後
兼侍御史賜紫金魚袋張愉可岳州刺史
同制

勅扼淮壓湘之列城曰泗與岳舟車會焉軍戎屯焉
是二郡守則易爲政先是分領者多會有政歲時罷

去長吏數易人必重困宜擇良二千石救而養之以
諒自澄城長訖尚書郎中間又再為州牧三宰劇縣
皆苦心卹隱煦嫗及物操刃決滯蠹驢霍號切有聲
而愉亦學古入仕甚自修飾河西有政次於諒焉故
命愉守岳命諒守泗仍以戎職留事憲簡章綬一加
於諒諒其聽之哉異日吾將以重官劇職處爾爾安
得不副吾所急用爾所長更宜以難理之郡自試爾
各依前件

裴廙授殿中侍御史制

勅某官裴廙貞觀初張行成為殿中侍御史糾劾巡
察時以為能朕思弘貞觀之風故選御史府官亦先
其精敏剛正者以爾廙動循道理語必信直勵其志

節有類行成因授厥官無忝吾舉可殿中侍御史

裴通除檢校左散騎常侍兼御史大夫充迴

鶻弔祭冊立使制

勅語曰使於四方不辱君命可謂士矣况馳轡軒奉
璽書稱天子之使以耀焜絕域者豈容易其選哉少
府監裴通溫敬忠所加之謹敏有言語可任以專對
有辯識可委以便宜屬北方君長來告代嗣求可以
將命展禮申吾哀榮之恩者其任不細頗難其人擇
臣者君而通可使命爲副丞相而加金貂之貴授冊
與節臨軒遣之庶乎遠而有光華且欲使絕俗殊鄰
益敬吾使也可依前件

元稹除中書舍人翰林學士賜紫金魚袋制

勅仲尼曰志有之言以足志文以足言言之無文行而不遠故吾精求雄文達識之士掌密命立內廷甚難其人爾中吾選尚書祠部郎中知制誥賜緋魚袋元稹去年夏拔自祠曹負外試知制誥而能芟繁詞剗弊句使吾文章言語與三代同風引之而成綸綍垂之而爲典訓凡秉筆者莫敢與汝爭能是用命爾爲中書舍人以司詔令嘗因暇日前席與語語及時政甚開朕心是用命爾爲翰林學士以備訪問仍以章綬寵榮其身一日之中三加新命爾宜率素履思永圖敬終如初足以報我可中書舍人翰林學士賜紫金魚袋

孔戣授尚書左丞制

勅漢詔丞相歲舉質直忠厚遜讓者蓋所以急賢俊
扶政教厚風俗也然則退藏踈賤之士苟有一善尚
搜而揚之况任久位崇才全望重而不致於急官要
職者安可以紀網庶政而羽儀朝廷焉正議大夫守
右散騎常侍上柱國賜紫金魚袋孔戣自十年來歷
中臺左曹國庠卿寺洎藩守近侍之職各以其任皆
有可稱矧又貞白端莊淡然自立進無矜滿之色居
無墮替之容求之周行不可多得若戣者宜尚扶政
教厚風俗之選也尚書丞掌決百事樞轄六曹晉魏
已還右卑於左惟有立者可以糾吏惟無瑕者可以
律人無以易戣往恭乃位可尚書左丞散官勲賜如
故

授柳傑等四人官充鄭滑節度推巡制

勅試太子司議郎柳傑等古者公府得自選吏屬今仍古制亦命領征鎮者必先禮聘而後升聞矧鄭滑帥承元輸忠仗順炳焉有大節於國奉上莅下實藉寮案以左右之而傑等或緣飾詞華或貯畜才行揣摩思誠以待已知宜展籌謀用光慰薦傑可某官充鄭滑節度推官

韓愈等二十九人亡母追贈國郡太夫人制

勅王者有褒贈之典所以旌往而勸來也其有淑順之德標表母儀者聖善之訓照燭子道者又有名高秩尊祿養之不逮者霜降露濡孝思之罔極者非是典也則何以顯其教而慰其心焉國子祭酒韓愈母

某氏等蘊德累行積中發外歸于華族生此哲人
我蓋臣率由茲訓教有所自恩不可忘是用啓郡國
之封極哀榮之飾嗚呼歿而無知則已苟有知者則
顯揚之孝追寵之榮可以達昊天而貫幽宍矣往者
來者監予心焉可依前件

授駱峻太子司議郎梧州刺史賜緋魚袋兼
改名玄休制

勅某官駱峻桂林守土臣式方言梧爲要郡兵後人
困乞廉貞吏以撫之又言峻守道抱器可以起用朕
方思良吏以活元元適副所求即可其奏宮寮郡印
命服嘉名四者與之足爲優異峻宜副所舉慎所爲
無以滋章爲聰明無以鹵莽爲高簡勉率中道往安

梧人可梧州刺史

劉總弟約等五人並除刺史賜紫男及姪六人除贊善洗馬衛佐賜緋同制

勅某官劉約等惟爾先父太師濟經武秉哲爲國元臣鎮陽之役實歿王事茂勲大節書于旂常惟爾兄司空總象賢纂戎以續名業納忠于王室振耀其家聲而爾約等亦能稟守其風忠恭孝友念義方之訓而不墮居貴介之地而不驕况兼器能皆可任用授郡符而加命服者五升朝序而佐環衛者六朱轡紫綬煥赫相望勲德之家於斯爲盛嗚呼昔武子有遺愛晉人憐其子趙季有篤行漢朝寵其弟今以濟之仗順積善宜鍾慶於子孫以總之輸忠立愛可延賞

公弟姪多與爵祿予無惜焉欲使天下知爾父兄忠順之若彼而國家報施之如此可依前件

王元輔可左羽林衛將軍知軍事制

勅國家設十二衛猶漢之有南北軍而左右羽林尤稱親重自諸衛而移鎮者謂之美遷左神武將軍王元輔生勲伐之家通吏理之事佐戎臨郡率著能名以掌勾陳而護建章備巡警而嚴羽衛大將軍事假而行之宜勵初終副茲寵任可依前

尚書工部侍郎集賢殿學士丁公著可檢校左散騎常侍越州刺史浙東觀察使制

勅古者通守守土刺史按部從宜務簡今則合之故任日崇而選日重非廉平簡直兼愷悌之德者曾不

足中吾選焉某官丁公著嘗以學行禮法誨予一人
報德圖勞連加寵擢起曹書殿兼而委之二職增修
三命益敬朕以浙河之左抵于海隅全越奧區延袤
千里宜得良帥俾之澄清往分吾憂無出爾右假左
貂而帖中憲操郡印而握兵符勉哉是行佇聞報政
可依前件

鄭綱可吏部尚書制

勅天官太宰秩序常尊自昔迄今冠諸卿首非位望
崇盛者不可以處之而朕即位以來凡命故相領者
三矣迨此而四可不重乎東都留守防禦使檢校刑
部尚書兼御史大夫滎陽縣開國公鄭綱有邴吉之
寬裕子產之恭惠合而爲用藩輔四朝故事遺愛留

于官次國之都府半在東周委以保釐人安吏肅重
傾耆德入領冢卿昔魏用崔琰毛玠典吏曹一時之
士以廉節自勵國朝以宋景李又掌選部亦能遏絕
訛僞振張紀綱官無古今得人則理吾言及此欲爾
繼之可吏部尚書

重授李晟通事舍人制

勅李晟昔管仲云升降揖讓進退閑習臣不如隰朋
今之通事舍人近此選也而晟常中此選善於其職
故相導通奏之節宣揚拜起之儀引而贊之不聞失
禮旣終喪紀宜服官常可使束帶曳裾爲吾謁者可
通事舍人

徐登授醴泉令制

勅徐登京兆尹言登前爲涇陽令清廉簡直奉法愛
人請補醴泉再考其績昔子路理蒲仲尼誨曰愛而
恕可以容困溫而斷可以抑姦今醴泉人與蒲相類
宜用此道往訓養之歲時之間期於報政可醴泉縣
令

王汝加朝散大夫授左贊善大夫致仕制

勅王汝善修其身爲時良士善訓其子爲國憲臣況
以時制之年知終請老不加優秩何厚吾風禮大夫
七十而致仕故我以朝散贊善二大夫之爵加乎爾
身惟秩與年兩皆得禮以茲退去亦足爲榮可依前
件

元公度授華陰令制

勅元公度吾欲理化萬方故自近始前授太宗正
印綬使牧華人飭能副吾此心選吏責課言公度廉
明有守乞宰華陰當道東西往來先是爲邑者多飾
厨傳舍奉賓客以沽名譽而不親吾人爾能革之足
爲良宰敬長畏法無慢乃官可華陰縣令

唐州刺史韋彪授王府長史楊歸厚授唐州

刺史劉旻授雅州刺史制

勅韋彪等善官人者先考其能然後授以事使輪轅
鑿柄各適其用則羣職庶政得以交修今以彪官久
年高勤於爲政俾從優逸入補王官以歸厚文行器
能辱在巴峽勵精爲理績茂課高區區萬州豈盡所
用且移大郡稍展奇才以旻早著戎功通詳吏事西

南物土罔不周知習俗從宜宜守嚴道分命以職各
用所長庶乎咸修乃官同底于理可依前件

鄭綱烏重胤馬摠劉悟李佑田布薛平等亡

母追封國郡太夫人制

勅經曰立身揚名以顯父母孝之終也而綱等學文
武之道以飾厥躬可謂善立身矣居將相之位以光
大其門可謂能揚名矣夫自家所以刑國本立而後
道生必待我哀榮之恩方成爾始終之孝是用啓封
追號各顯乃親慰後先前孝道備矣可依前件

奉議郎殿中侍御史內供奉飛騎尉賜緋魚

袋盧商可劔南西川雲南安撫判官朝散

大夫行開州開江縣令楊汝士可殿中侍

御史內供奉充劔南西川節度叅謀

同制

勅劔南西川雲南安撫判官奉議郎殿中侍御史內供奉飛騎尉賜緋魚袋盧商等士之束髮立身爲知已用也無遠近無勞逸但問所務者何從者誰耳今蜀之帥潞之長皆勤於述職妙於揀賢多得其儁材樂告以善道故以叅其選焉或從事有勞或即戎奔命輟玄黃之著述振銅墨之滯淹以良士而贊賢侯宜乎多成功而鮮敗事矣勉思所立各服乃官

李演贈太子少保制

勅夫生立勲勤下以忠事上也歿加褒飾上以義答下也忠義臻其分哀榮極其恩而君臣之道全矣故

奉天定難功臣開府儀同三司檢校兵部尚書兼左
衛上將軍御史大夫李演忠信以爲幹義勇以爲噐
噐與幹合鬱成將材故出長諸侯入統七萃拊循警
衛朕甚賴之方深倚仗遽此淪謝茲予所以當宁興
念廢朝軫懷聞鼙鼓而長太息者也追崇之命宜有
加焉可贈太子少保

李諒授壽州刺史薛公幹授泗州刺史制

勅泗州刺史李諒等詩云愷悌君子人之父母朕三
復斯言往往興嘆安得循吏仰父母吾人乎吾前命
諒爲泗守未即路會壽守植卒因改諒守壽命公幹
守泗諒之理課前詔詳矣公幹自尚書郎連領二郡
政平法一甚便於人加以有理戎之材可付留事故

輟軍保仍憲秩而兼寵之夫壽與泗皆郡之大者也
諒與公幹皆二千石之良者也以大郡委良吏不亦
宜乎噫諒無忘澄城之理公幹無替亳城之政則愷
悌之化吾有望於二郡焉諒可壽州刺史公幹可泗
州刺史

柳公綽罷鹽鐵守本官兵部侍郎制

勅某官柳某昔先皇帝知爾有材元和已來應用不
暇及領擢管漕運之務屬陵寢郊之禮財給事集
時乃之功宜有轉移以均勞逸况聞牢籠無遺利課
督有常規今詔刑部尚書播代之亦令守而勿失朕
將興理化先務根本凡百職事悉歸有司惟茲夏官
實掌戎政簡稽調補今方其時司馬貳卿佐平邦國

是爾本職無忘增修可守兵部侍郎

崔元備張惟素鄭覃陸灑韋弘景賜爵制

勅崔元備等禮尊重於復土事莫大於慎終使朕以
孝敬之誠獲貢于先帝實賴左右侍從之臣服勤祇
事展四體而竭一心誠俾予無悔賞不敢忘爵不敢
愛爾宜䟽封服命而揚之可依前件

劉約授棣州刺史制

勅前齊州刺史兼御史中丞劉約故太保濟之子太
尉總之弟也吾常思濟之功總之忠而嘉約之謹厚
累遷至齊州刺史在官無敗事罷秩有去思念舊錄
能宜當寵用況公侯之後約有通才封域之間棣爲
要郡委之共理誰曰不然可使持節棣州諸軍事棣

州刺史依前御史中丞散官勲如故

李肇可中散大夫郢州刺史王鎰可郎州刺史溫造可朝散大夫三人同制

勅朝請大夫使持節澧州諸軍事澧州刺史上柱國賜紫金魚袋李肇等乃者李景儉使酒獲戾而肇等與之會飲失於檢慎宜有所由是左遷分爲郡守今首坐者旣復班列緣累者亦當徵還但以長吏數易其弊頗甚况聞三郡皆有政能人方便安不宜遷換故吾以采章階級並命而就加之蓋漢制進爵秩降璽書慰勞良二千石之旨也爾當是命得不勉哉

白氏文集卷第五十

白刃文素卷第五十七

...

...

...

...

...

...

...

...

...

...

...

白氏文集卷第五十一

中書制誥四

新體祭文冊文
附凡五十道

贈劉總太尉冊文

維長慶元年四月某日皇帝若曰朕聞古有履忠仗
順生而大有爲者又有功成身退歿而永不朽者非
正氣令德間生挺出則高名大節孰能兼之哉故天
平軍節度使檢校司徒兼侍中楚國公劉總降自天
和生爲人傑得君於先帝叶運於昌時纂戎弓裘守
土燕薊迨此一紀北方晏然有開必先納欵于我沈
斷大事奮揚奇謀捧幽都四封之圖挈盧龍三軍之
籍盡獻闕下高謝人間感動君臣驚激忠義顧妻子
若脫屣視富貴如浮雲惟道是從奉身以退仲連事

成而蹈滄海子房名遂而追赤松賢明所歸今古一
致朕方改授兵柄移鎮鄆郊命作司徒倚爲左相期
奮乃志將沃朕心而天下憇遺邦失柱石夫臣戴君
如元首則君視臣如股肱股肱或虧何痛如是茲朕
所以廢朝軫念備禮加恩庸建爾于上公蓋褒贈之
崇重者也嗚呼爾總尚知之乎今造使某官某副使
某官某持節冊贈爾爲太尉

傅良弼可鄭州刺史制

勅金紫光祿大夫使持節沂州諸軍事行沂州刺史
兼御史中丞騎都尉傅良弼燕冀之間紛擾之際多
壘失守孤城保全介于險中率乃麾下轉戰郊野來
覲闕庭狗義滅親忘家喪子忠勤勇烈人所難能若

不褒陞何勸來者海沂剖竹未足報功溱洧頒條可兼觀政敬承後命無替前勞可使持節鄭州諸軍事行鄭州刺史兼御史大夫散官勲如故

河北權鹽使檢校刑部郎中裴弘泰可權知具州刺史依前權鹽使制

勅某官裴弘泰以幹蠱之才領鹽鹵之務管權條制動皆得宜觀其所能若有餘地可假兼職俾之牧人而河北列城久乏良吏俗多思理政不難施亦猶凍餒之人易爲衣食今予命爾煦而飫之襦袴之謠佇入吾耳可兼知貝州刺史

崔陵可河南尹制

勅河洛千里都畿在焉俾之又安屬在尹正鳳翔隴

州節度觀察處置等使正議大夫檢校禮部尚書兼
鳳翔尹御史大夫上柱國開國男食邑三百戶賜紫
金魚袋崔陵有精敏之用潔直之操施于有政由是
知名始資州縣之勞卒致公卿之位况刺部有理行
主計無僣違尹右輔而鎮西郊蓋獎能報勤之旨也
昔吳公爲河南守謹身廉平人服教化袁安爲河南
尹政令清肅號爲嚴明誰其嗣之無易陵者往爲表
則勿替能名可檢校禮部尚書兼河南尹散官勳封
賜如故

侯丕可霍丘縣尉制

勅賜太常寺奉禮郎翰林待詔上護軍侯丕夫執藝
以事上奉詔而處中其於出入謹身夙夜祗命比他

局署實倍恭勤既寵之以職名又優之以祿俸蓋先勞後食之義也汝其承之可守壽州霍丘縣尉依前翰林待詔勲如故

崔楚臣可兼殿中侍御史制

勅成德軍節度押衙銀青光祿大夫檢校太子賓客兼監察御史崔楚臣材膺爪士職在牙旗每祇命以奉辭必竭誠而得禮既嘉詳敏亦念恭勤式示寵名宜遷憲秩可殿中侍御史餘如故

王庭湊五哥之曾祖可贈越州都督祖未怛活可贈左散騎常侍父昇朝可贈禮部尚書制

勅成德節度鎮冀深趙等州觀察處置等使金紫光祿大夫檢校工部尚書兼鎮州大督府長史大夫上

柱國太原縣開國男食邑三百戶王庭湊曾祖故忠
武將守左武衛大將軍貞外置同正貞兼試太常卿
五哥之等鬼神有知履孝敬者福祿至王侯無種仗
忠信者富貴來我有列臣本於良胤奮發而勵節許
國感激而揚名顯親夫教必有初德無不報安有收
其材而遺其本愛其後而忘其先乎是用褒崇以弘
寵澤庶使聞者起孝作忠可依前件

崔羣可祕書監分司東都制

勅前武寧軍節度徐泗濠等觀察處置等使正議大
夫檢校兵部尚書使持節徐州諸軍事兼徐州刺史
御史大夫上柱國賜紫金魚袋崔羣天受至寶爲國
重器始自修己移於事君輔弼藩宣不失其道及雖

征鎮召赴闕庭方登道途遂遘疾恙正在頤養之際
豈任朝謁之勞誠宜許以便安不可闕其祿食而移
秩外史分曹東周加寵優賢無易於此且有後命俟
其有瘳可祕書監分司東都散官勲賜如故

董昌齡可許州長史制

勅將仕郎權知泗州長史兼殿中侍御史賜緋魚袋
董昌齡頃爲宰邑今贊郡符皆聞約已之名每展在
公之節稽其噐局允謂廉能議以稍遷用彰勤効可
許州長史兼侍御史散官勲如故

柳經李褒並泗州判官制

勅徵事郎前河南縣尉柳經儒林郎試太子通事舍
人李褒等瀕淮列城泗州爲要控轉輸之路屯式遏

之師故府有寮軍有侔選擇補署得聞於朝廷而經
等皆有所長宜當是選守臣置奏因而可之仍加秩
命用示優寵經可監察御史充泗州團練副使散官
如故褒可試太常寺協律郎充武寧軍節度泗州兵
馬留後判官仍改名言散官勲如故

張諷等四人可兼御史中丞侍御史監察御

史同制

勅義成軍節度馬步都知兵馬使光祿大夫檢校太
子詹事兼侍御史上柱國張諷等御史府自中執憲
暨察視之官皆顯秩也唯懷材而展効者可以授焉
爾等昨領偏師出疆赴難指蹤而去摩壘而還忠勇
勤勞宜有加獎故以憲職第而寵之可依前件

啖異可滁州長史許志雍可永州司戶崔行
儉可隋州司戶並准赦量移制

勅守袁州司馬貞外置同正貞啖異等有司奉新制
明舊章凡負疵瑕必霑慶澤况爾等各有才用多淹
歲時譴累重輕遞從恩貸班資遠邇率以例遷如聞
進修豈忘牽復可依前件

程執撫亡父懷信贈太保李佑亡父景略贈
太子少傅栢耆亡父良噐贈太子少保白
餘盛亡父孝德贈太保同制

勅中散大夫檢校右散騎常侍兼右神武軍大將軍
知軍事御史大夫上柱國河東縣開國男食邑三百
戶賜紫金魚袋程執撫父贈太子太保懷信等咸有

忠勲播爲先德悉承義訓坐後昆故吾令臣皆乃
愛子襲弓裘而稟詩禮猶水木之有本源將使天下
之爲人子者感恩天下之爲人父者知勸宜加寵贈
以表顯揚可依前件

嚴謨可桂管觀察使制

勅漢置部刺史掌奉詔條糾吏理蓋今觀察使職耳
桂林秦郡也東控海嶺右扼蠻荒自隋迄今不改戎
府地遠則權重俗殊則理難馭而化之非才不可朝
議大夫前守祕書監驍騎尉賜紫金魚袋嚴謨嘗守
商洛刺黔巫州部縣道謐然安理是能用寬猛相濟
之政撫夷夏雜居之人故也跡其往効式是南邦况
爾操行端和文學精茂賓寺書府善於其官勉副前

侯申後命可使持節都督桂林諸軍事守桂州刺史
兼御史中丞桂州本管都防禦觀察處置等使散官
勲如故

杜式方可贈禮部尚書制

勲生有寵祿歿有褒崇此王者所以明終始之恩厚
君臣之道也故桂州本管都防禦觀察等使正議大
夫使持節都督桂州諸軍事守桂州刺史兼御史中
丞上柱國南陽縣開國男賜紫金魚袋杜式方慶襲
台庭任當垣翰服名教乃保家之子對風聲爲守土
之臣盡禮事君勞心奉職奄忽淪逝念之惻然况近
屬連姻遠藩捐館聞訃之命實悼中心贈飾之恩宜
加常等俾趨榮於入座用賁寵於九原可贈禮部尚

書仍贖布帛二百段米粟二百石委度支逐便支遣

武昭除石州刺史制

勅某官武昭王師伐蔡爾在行間致命奮身挑戰當
寇忠憤所感卒獲生全求之軍中不可多得司馬以
爾信直謹厚可領邊城爾宜酬乃已知副我朝獎撫
獯戎雜居之俗安離石重困之人勉而莅之其任不
細可石州刺史

梁希逸除蔚州刺史制

勅某官梁希逸頃爲蔡將陷在賊庭知有君臣不顧
妻子率其所屬當戰陣前反旆倒戈翻然歸我忘家
之士希逸有之間從司空再平淮右指蹤銜命皆稱
所使可以移用俾之守疆北邊列城蔚爲衝要雄右

軍號務兼錢刀疇勤選能俾乃兼領宜思來効以績
前勞可蔚州刺史兼橫野軍使并知本州鑄錢事

盧元勳除隰州刺史制

勅盧元勳乃者鎮帥身喪正承元納款之際栢耆將
命之初軍情洶然未知嚮化而元勳挺身奮臂出於
衆中指明安危分別逆順顏色不撓聲氣甚勵言行
事立朕甚多之雖有優升未酬義烈宜以一郡寵而
旌之用勸四方聞其風者可隰州刺史

楊孝直除滑州長史制

勅楊孝直早以材力從戎異方專習武經通知吏事
承元移鎮孝直實來詢謀驅馳有所裨助軍郡之佐
寵秩非輕用荅忠勞以明勸獎可滑州長史

張嘉泰可延州長史制

勅前丹州司馬張嘉泰一從戎旅多歷歲時奉職有勞率身無過軍部長佐資秩不卑自丹轉延頗爲優穩題輿便道往守乃官可延州長史

魏玄通除深王府司馬制

勅魏玄通有禦侮之才扞城之略服勤戎職善守邊州訓旅牧人有可稱者夫文武迭用出入序遷所以關才能而均勞逸也爾宜解綬郡邸曳裾王門飾躬慎儀以奉朝謁可依前件

楊造等亡母追贈太君制

勅通事舍人楊造翰林待詔某亡母等生播徽華歿留儀範訓保家之子爲有國之臣或相禮彤庭或待

詔金馬咸居禁近率有忠勤風對之心必憂深而思
遠蓼蕭之澤宜自葉而流根並啓邑封各從子貴揚
名之孝與汝成之可依前件

張值李翱等二十人亡母追贈郡縣夫人制
勅壽州刺史張植亡母某氏等夫忠於上者教有所
自仁於下者恩有所延孝理之風實繇此作當今良
二千石皆與朕共理雖祿不逮養而名可顯親將慰
匪莪之心宜流自葉之澤俾從子貴咸贈邑封

陳中師除太常少卿制

勅尚書吏部郎中兼侍御史陳中師早以體物之文
待問之學中鄉里選第甲乙科及筮仕立身皆有本
末不背俗以矯逸不趨時以沽名從容中道自致聞

望累踐郎署再叅憲司官無卑崇事無簡劇如玉在
佩動必有聲爲時所稱何用不可朕以立國之本禮
樂爲先今之太常兼掌其事貳茲職者不亦重乎歷
代迄今謂之清選往復是命佇觀有成予方急才爾
寧久次可太常少卿

衢州刺史鄭羣可庫部郎中齊州刺史張士

階可祠部郎中同制

勅某官鄭羣等今之正郎班望頗重中外要職多繇
是選故其所選不得不慎必循名實而後命之羣與
士階久典名郡謹身化下有循吏之風會課陟明宜
當是選國之大事在祀與戎一掌祠曹一司武庫各
領其要爾宜敬之羣可庫部郎中士階可祠部郎中

元稹可太子左諭德依前入蕃使制

勅通事舍人元稹東宮之有諭德猶上臺之有騎省也清班優秩所選非輕朕前遣使臣往修戎好以言信行敬命爲介焉揚旌出疆反駕奔命有所啓奏多叶便宜乃知得人可以卒事故加是命以寵勸之可太子左諭德依前入蕃使

盧昂量移虢州司戶長孫鉉量移遂州司戶

同制

勅萬州司戶參軍盧昂等頃負疵瑕各從譴謫或遠竄荒裔或未復班資旣逢蕩滌之恩俾及轉遷之命況聞修省以克已固將校試而用能吾無棄人汝宜自効可依前件

李右楊毅張殷衡等並授官充涇原判官同

制

勅李石等用武之地曰涇與原合爲一鎮控扼夷虜
朕授布鉞責其成功布乃祗惕受命思有以自輔者
因上言石毅殷衡等學業才畫堪置幄中分務列官
咸可其請而布憂邊甚切選士必精爾宜各竭所能
爲知已用可依前件

李演除左衛上將軍制

勅王者法勾陳設環列非勲勤之將信近之臣則何
以久張爪牙轉置肘腋者也某官李演嘗從德宗皇
帝南蒐于梁籍名功臣謂之定難洎出分戎律入拱
宸居內外周旋不懈于位交戰之下周廬肅然今之

轉遷示益親信移領左廣仍叅夏卿夫八屯之警巡
七萃之勤情爾爲其正盡得察之宜惜前勞無隳乃
力可依前件

康昇讓可試太子司議郎知欽州事兼充本
州鎮遏使陳倓可試太子舍人知巒州事

兼充本州鎮遏使李顥可試太子通事舍
西人知賓州事兼賓澄巒橫貴等五州都遊

奕使馮緒可試太子通舍事人知田州事
充左江都知兵馬使滕殷晉可試右衛率

府長史知灋州事兼充左江都知兵馬使
五人同制

勅容州本貫經略招討左押衙兼右廂兵馬使康昇

讓等有奉職徇公之勤有理戎殄寇之效其帥公素
上章以聞吾方念勞爾宜受賞况容之諸郡有大小
郡之兼職有重輕量能第功分命而往噫方藩雖遠
朝聽甚卑有善必聞無功不錄吾言及此欲爾知之
可依前件

西川大將賀若岑等一十二人授御史中丞

殿中監察及諸州司馬同制

勅丞相鎮蜀志在憂邊俾靜蕃蠻實資將校故加寵
任以責成功某官某等若干人類例勲勞進登班秩
憲官名重郡佐祿優叅以命之足爲榮獎爾宜恭承
主帥慎守封疆戮力一心無落戎事可依前件

前右羽林將軍李彥佐服闋重除本官兼御

史中丞知軍事制

勅軍有羽林用法星象統之爪士以拱宸居某官某前以忠勞選登戎衛而能訓勇力之士以備時使中誰何之令以奉微巡夙夜祗嚴不懈于位既終喪紀宜復官常假中執憲之名行上將軍之事勉修舊職用副新恩可依前件

奉天縣令崔鄴可倉部員外郎判度支案制勅奉天縣令崔鄴大凡南宮郎無非慎選者也況官之屬有堆案盈机之文有月計歲會之課故員外郎不可逾時缺不待滿歲遷事劇才難斷可知矣而鄴自操白簡宰赤縣繩舉違謬惠養鰥惇皆有善聲著于官次豈能於彼而不能於此乎爾宜率原人佐計

務決繁析滯期有可觀可依前件

翰林待詔李景亮授左司禦率府長史依前

待詔制

勅某官李景亮夫執藝事上者必揆日時計勞績而後進爵秩以旌服勤況待詔官闡飾躬晨夜比於他職宜有加恩官坊衛官以示優獎可依前件

故鹽州防秋兵馬使康太崇贈鄧州刺史制

勅故某官康太崇嘗習鞞鈴夙稱拳勇使之訓旅能叶武經使之守疆能著戎績永言殂謝宜及褒榮俾追寵於朱轡庶知恩於黃壤可贈鄧州刺史

劉總外祖故瀛州刺史盧龍軍兵馬使張懿

贈工部尚書制

勅故某官張懿德善著將啓後人忠孝者克揚前列
有美必復宜其然乎而懿仗忠履義體仁養勇學究
韜略藝窮騎射負幽燕之勁氣雖振其名有將相之
長才不得其位命屈當代慶流後昆有外孝孫爲吾
賢帥以忠許國以順克家揚名顯親自義率祖推恩
外族歸美前修俾追八座之榮以輟九原之嘆可依
前件

劉總外祖母李氏贈趙國夫人制

勅李氏族茂本枝行光內則柔明繕性和淑保身輔
佐良人克諧家道訓成賢女作相令門善積於中福
延於後段公威德當流慶於外孫令伯孝心願推恩
於祖母式遵贈典用贊德芬宜從大國之封追正小

君之命可贈趙國夫人

蕭俛一子迴授三從弟伸制

勅吏部尚書蕭俛頃在台庭時逢郊禮大行慶澤先及輔臣當延賞於元嗣願推恩於友愛厥有典例因而從之咨爾弟伸可恭成命可河中府參軍

賈隣入迴鵠副使授兼御史中丞賜紫金魚

袋制

勅少府少監賈隣行人之官官必有介所以敬王事而重國命也以爾隣稟訓台鼎飾躬搢紳自登班行多歷年祀恪勤官次保守令名斯可以卒貳使臣諭申朝旨宜假憲秩仍加命服以示兼寵俾之出疆况繼好二邦奉辭萬里副車之任選亦不輕茲吾使能

期爾復命可依前件

張屺授廬州刺史兼御史中丞制

勅廬龍軍節度判官檢校刑部郎中張屺司徒總言爾從事於幽薊之間有年歲矣嘗委事任備觀器用務叢而益辦職久而彌勤頗出輩流宜加獎擢况公侯之嗣幕府之英餘慶所鍾有才如是今以名郡寵而任之旌善勸能仍兼中憲可廬州刺史

韓公武授左驍衛上將軍制

勅朝散大夫檢校左散騎常侍兼右金吾衛將軍御史大夫上柱國賜紫金魚袋韓公武我元老之令子也孝於家忠於國故出則秉旄鉞入爲執金吾寵任益崇謙敬彌著而勤於夙夜疾癘所侵上陳表章乞

就願養夫環衛之列心旌之臣雖親信之寄則同而
勞逸之間或異宜輟繁重俾從便安可檢校左散騎
常侍兼左驍衛上將軍御史大夫散官勳如故

姚元康等授官充推官掌書記制

勅朝散郎行秘書省祕書郎姚元康儒林郎試太常
寺協律郎鄭懿等益部浮陽皆大征鎮也文昌全略
皆賢將相也而能以禮聘士以職任才多聞得人咸
樂爲用况爾等籌謀文藻各負所長苟能贊察兼掌
奏記孜孜不怠翩翩有聲慰薦褒升其則不遠元康
可試左武衛倉曹參軍充劔南西川觀察推官散官
如故懿可試左金吾衛兵曹參軍充橫海軍節度掌
書記散官如故

楊玄諒等三十人加官制

勅右神策軍忻州行營兵馬使試太常卿楊玄諒等夫才不錄則勸善之道廢勤不賞則念功之典缺而玄諒輩凡三十人咸列禁戎遠從征討臨難有身先之勇奔命無道弊之勞宜以祿秩彌其忠效所謂材不失選賞不逾時亦欲使爲善者不疑有功者速勸也可依前件

李益王起杜元穎等賜爵制

勅李益等去年春朕以陵寢事大哀惶疚心而益等齋慄奔走各率其職俾予孝道刑于四海何嘗一日而忘之即命有司舉常典凡爵之高下視執事之重輕有司亦能遵我成命第而次之進給益封無有不

當由益而下爾宜欽承可依前件

王計除萊州刺史吳暉除蓬州刺史制

勅王計等咸以材略載筆從軍藝學智謀需然足用
多歷年祀備嘗艱危進退周旋不聞失道司徒弘正
詳奏以聞因以竹符分命試吏而萊蓬二郡各介一
方牧人者但不擾其心不奪其力則雖華夷南北土
物不同皆可以自足自遂矣宜用此道往安養之可
依前件

義武軍奏事官虞候衛紹則可檢校秘書監

職如故制

勅某官衛紹則服勤藩鎮敷奏闕庭奉王帥之表章
達軍府之情狀嘉其忠效宜可褒升俾洽新恩用充

舊職可依前件

深州奏事官衛推試原王友韓季重可兼監

察御史充職制

勅某官韓季重上將臨戎陪臣將命詳其奏報頗盡
事情特加寵章用獎勞効王官憲職以示兼榮可依
前件

袁幹可封州刺史兼侍御史制

勅安南兵馬使封州刺史兼監察御史袁幹委質藩
方悉知戎旅嘗驅寇盜累著功勞故命遷領郡符超
升憲簡足以安荒俗耀遠人敬而承之無替前効可
封州刺史

華州及陝府將士吉少華二千三百三十五

人各賜勲五轉制

勅某官吉少華等距河重鎮分陝近藩俾遏寇虞實
資士旅勞旣同力賞宜徧行次第其名書于勲籍可
各賜勲五轉

祭迴鶻可汗文

維長慶元年歲次辛丑月日皇帝遣使朝議大夫檢
校右散騎常侍兼少府監御史大夫雲騎尉賜紫金
魚袋裴通致祭于故愛登羅汨沒密施毗伽保義可
汗之靈專以英武之姿雄奇之策撫有九姓制臨一
方氣吞諸戎名播上國况能嚮風納款繼好息人代
爲親鄰歲入職貢方賴威略共清寰瀛倚爲長城永
固中夏而天殲驕子國喪名王奪氣色於陰山賈精

光於昴宿凶計云至悲懷用深故遣使臣往將國命
展弔奠之禮申哀榮之恩猶有明靈當鑒誠意尚饗

白氏文集卷第五十一



某官言少華等昨河重鎮分陝近藩俾過定廣會

資上旅勞既同方賞宜徧行次第其各書于勳籍可

各賜勳五

祭

維長慶元

校右散騎

自文文業卷第

方氣吞諸

取視與之

胸然最前

胸然最前凶



白氏文集卷第五十二

中書制誥五

新體凡五十道

京兆尹盧士玫除檢校左散騎常侍兼中丞

瀛漢二州觀察等使制

勅夫疆理天下壤制四方乘時省置何當之有故方
隅未寧務先經略則專委方伯以摠統之及兵革甫
定思弘風化則並命連帥以分理之朕常以幽薊一
方環封千里延袤廣莫專制實難屬元戎改轄新帥
進律因而置制以叶便宜蓋王者施張變通之要也
京兆尹盧士玫為人端和為政寬簡自尹京輦人其
便安今司徒總籍甚爾名叶從人望河間列郡乞委
士玫因而可之必易為理況新造之府經始之政勞

俸安輯是爾所能俾珥左貂兼執中憲寵任不細勉哉是行可依前件

武寧軍軍將郭暈等五十八人加大夫賓客

詹事太常卿殿中監制

勅某官某頃以齊寇發狂王師致討武寧裨將五十

八人雖有元戎指蹤制勝實由衆校同心許國合力

成功宜以憲秩儲寮寺卿府監舉申賞典用益勲庸

可依前件

贈僕射蘇兆男三人妻兄一人並被蔡州誅

戮各贈太子贊善大夫等制

勅故某官男等淮寇之起爾陷其中能守父訓不失

臣節竟遇逢蠶並為鯨鯢葵將死而心傾劒雖埋而

氣在毒延禦侮禍及維私將賁幽魂宜追寵命俾賻
青宮之秩用伸赤族之寃可依前件

王士則除右羽林大將軍制

勅羽林所設上法星文軍衛之中號爲雄重稱茲選
任不易其人左驍衛將軍王士則勲賊之家義方之
子發身學劍餘力知書早踐班榮累叅環列職近而
身彌檢慎任久而心益恭勤卑以自居勞而不伐况
一備禁衛四爲偏將滯於久次宜有超升俾領上軍
仍遷右廣統良家之騎士訓期門之材官寵任不輕
無墮於事可右羽林軍大將軍

前穀熟縣令李季立授奉天丞兼監察御史

充迴鶻使判官制

勅某官李季立蕃國通聘使臣告行上請屬察同役
王命以爾常爲令長頗有幹能加之恪恭可備選擇
假威憲職兼命邑丞足示優榮勉勤任使可依前件

李懷金等各授官制

勅博野鎮都虞候殿中監李懷金等戮力戎行叶謀
王事旣展扞城之効彌章奉國之心不加寵榮何勸
忠勇敬授爵命勉思令圖可依前件

王日簡可朝散大夫德州刺史制

勅前代州刺史代北軍使王日簡吾聞任有才則事
集獎有勞則功勸以日簡嘗爲代守軍睦人安旌効
所能可居要地是用超登階級遷領郡符勵精壹意
其聽吾言夫主憂則臣勞時危則節見今寇戎暴起

封域未寧是忠臣奮奇謀烈士展殊効之日也朝立
功而夕受賞汝其念之哉可德州刺史

薛元賞可華原縣令制

勅前大理丞薛元賞旬服之制也對以尹正承以令
長上下有統而理化行焉以元賞前爲廷尉丞察獄
評刑頗聞敬慎寺卿奏課邑宰缺貞故移欽恤之心
使布惠和之化上承爾長下字吾人無或越思而乖
統理可華原縣令

王承林可安州刺史制

勅安陸古鄖國 介荆漢之間承軍旅之後宜得謹
良長吏以養理之也前相州刺史王承林比刺安陽
勤修其職錄勞獎善故申命焉況爾生勲伐之家早

階寵祿宜自修立以光大其門爾當思勤儉以檢身
務廉平以臨下率吏用禮勸人歸農勿慎勿佻一遵
吾之約束可安州刺史

嚴綬可太子少傅制

勅東朝保傅歷代尊崇漢擇名儒任先疎廣晉求耆
德選在山濤實資六傅之賢用弘三善之道檢校司
徒兼太子少保嚴綬文雅成器恭謙致用出領重鎮
以帥諸侯入爲具寮以長卿士歷踐中外備嘗艱虞
殆三十年勤亦至矣況理心以體道知命而安時是
謂教誨之人可領調護之任由保遷傳爾其敬之可
太子少傅

源寂可安王府長史

勅義成軍節度判官檢校兵部員外源寂早膺慰薦
累展才能謀畫有終恭勤無怠守臣推善列狀升聞
可使東帶立朝廷曳裾遊藩邸俾從賓佐入補王官
鄭枋可河中府河西主簿制

勅鄭滑觀察推官試太子通事舍人鄭枋名列士林
職叅軍府修身無闕從事有勞旣展効於即戎宜試
能而補吏俾之劍邑庶有可觀可依前件

喬弁可巴州刺史制

勅權知巴州刺史喬弁前假竹符俾臨巴郡一意爲
理三年有成州人借留廉使置奏旣因會課宜及陟
明九仞之功無虧一簣無忸真授而怠初心可巴州
刺史

薛戎贈左散騎常侍制

勅夫有名於時有勞於國盡忠以事上遺愛而及下則必生享寵祿歿加褒崇所以旌善人而勸來者故浙東觀察使越州都督兼御史中丞薛戎挺英於冠族擢秀於士林凡踐官榮皆著聲績及授符節委之察廉自江而東政成人又老而將智病且知終方覲闕庭忽捐館舍是用廢朝軫念加賻申恩俾增九原之光追備八貂之列可依前件

辛弁文可淄州長山縣令制

勅趙州臨城縣令辛弁文既有英材又知臣節遁逃寇難奔走道途言念忠勞宜加恩獎俾換銅墨移宰長山可依前件

知汴州院官侍御史盧蒙可檢校倉部員外郎陝府院官盧台可兼侍御史鄭滑院官李克恭可試大理評事獨孤操可衛佐並依前知院事同制

勅鹽鐵官漕運職小大遠邇羅布於四方自丞相播兼領以來而撮大綱覆羣吏職以能進秩由課遷法無僭差人有懲勸今台蒙克恭操等咸當自舉分命以官勉副已知無忝成命可依前件

王智興可檢校右散騎常侍兼御史大夫充武寧軍節度副使領本道兵馬赴行營制勅沂州刺史御史大夫王智興李愿李愬之鎮武寧也汝爲裨將勵節忘身濟成大功汝實有力獎其誠

白集卷之三十一
五十一
効擢授郡符海沂之間又著聲績宜加新命以寵舊
勞仍提銳師往副戎律夫將之撫衆如子弟則衆之
視將如父兄苟推赤心而無疑必蹈白刃而不悔勉
親士卒佇翦寇戎可依前件

田羣可起復守左金吾衛將軍貞外置兼澶
州刺史制

勅前左武衛將軍田羣忠謹立身韜鈴嗣業自參戎
衛尤見恭勤而燕薊之間澶爲要郡公侯之後羣有
令名俾分符竹之榮佇濟弓裘之美宜奪情禮起而
用之

楊於陵母亡祖母崔氏等贈郡夫人制

勅大孝存乎始終殊恩被於幽顯追榮之命安可廢

戶部尚書楊於陵亡祖母崔氏等風範有初光塵
不昧發揮婦道標表母儀施及孝孫陟于高位夫蘊
德者坐裕于後揚名者光昭其先俾彰積慶於中故
許推恩而上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專
城職當守土不承制命擅赴闕庭違越詔條叛離官
次將懲慢易宜舉憲章可連州司馬仍馳驛發遣

鄭公達可陝州司馬制

勅朝議郎守原王府長史上柱國賜緋魚袋鄭公達
衆推士行時許吏才自列班榮尤彰恭恪夙夜匪懈
春秋已高宜罷曳裾之勤往贊坐棠之理是爲優秩

用蒼令名可守陝州大都督府右司馬散官勲賜如故

劉奉倫可起復謁者監制

勅朝議郎前行內侍省內謁者監上柱國賜紫金魚袋劉奉倫古者有中涓謁者皆侍奉親近之臣也今之寵秩亦由舊焉況泰倫有行藝可以飾身才幹可以掌務監臨內署朝請中闈謹密端和甚宜厥職久於其事無之實難宜加進秩之恩仍舉奪情之典勉承獎任勿替初終可起復朝議大夫行內侍省內謁者監

王師閔可檢校水部員外郎徐泗濠等州觀

察判官制

勅前徐泗濠等州觀察支候朝議郎殿中侍御史內供奉上騎都尉賜緋魚袋王師閔朕以師律授智興智興以軍書辟師閔才旣爲知已用官不俟滿歲遷所以使能而責理也然則贊廉察安戎旅旣命之後吾有望於爾焉勉副所從佇展來効可檢校尚書水部員外郎兼殿中侍御史充徐泗濠等州觀察判官勲賜如故

薛從可右清道率府倉曹制

勅三品子薛從惟汝父平守吾藩鎮能以忠力殄寇安人疇庸旣以啓封延賞亦宜及嗣勉承義訓無忝寵章可朝散郎行右清道率府倉曹參軍

義武軍行營兵馬使高從政等五人河東節

度行營兵馬使傅義等二十四人並破賊
可御史大夫中丞侍御史制

勅古者賞不逾時所以勸勲庸也爵有加等所以激
忠勇也而某官高從政等以義武之師統晉陽之甲
前蹈白刃中推赤心大摧賊徒連告戎捷超榮速賞
爾實當之故視軍功逆遷憲秩破竹之勢其思有終
可依前件

故奉天定難功臣試殿中監陳日榮等一十
二人可贈商鄧唐隋等州刺史制

勅春秋崇褒善之義國家厚追榮之寵其身歿而名
不殞時去而恩未及者大司馬得稽勲籍舉而行之
故某官某等凡十二人按狀徵書宜加寵命飾終之

與其可廢乎可依前

段斌宗惟明等除檢校大理太僕卿

勅義武軍節度都押衙兼侍御史段斌衙前虞候檢校太子賓客宗惟明等寇虞未平將校方用宜以爵賞勸其忠勞而斌奔命獻俘惟明奉章告捷各勤乃事咸造于庭並加寵榮以示優獎斌可試太僕卿依前兼侍御史惟明可檢校大理卿餘各如故

戶部尚書楊於陵祖故奉先縣主簿楊冠俗可贈吏部郎中於陵奏請迴贈制

勅故某官楊冠俗貽厥孫謀坐裕後世揚其祖美不忘先也以冠俗之棲遲下位道屈於時以於陵之光大其門慶鍾于後生不遲事歿有追榮宜加義率之

心用舉飾終之典可贈吏部郎中

故光祿卿致仕李恕贈右散騎常侍制

勅故某官某國老之子藩臣之兄嘗列棘以承家竟
懸車而捐館生加爵寵歿及褒榮茲惟舊章用慰幽
窆

劉悟妻馮氏可封長樂郡夫人制

勅古者有策名命婦號夫人蓋積善於閨門而受
封於國邑也澤潞節度使劉悟妻馮氏傳芳茂族作
合良臣成此忠貞之功因於輔佐之力禮從夫貴慶
叶家肥俾開大郡之封以正小君之命可封長樂郡
夫人

夏州軍將二人授侍御史制

勅某官某等早稱武藝久隸軍麾稟命元戎服勤王
事或千里移鎮從爲紀綱或十乘啓行倚爲肘腋繇
歷年月積成勤勞不加寵榮何勸忠效並命憲職宜
敬奉之並可兼侍御史餘如故

尉制

勅乃者魏兗二帥以田夷吾曹璠善屬文貢置闕下
有司奏報明試以詩五言百篇終日而畢藻思甚敏
文理多通賢侯薦延宜有升獎因其所貢郡縣各命
以官而倚馬爰來衣錦歸去以文得祿亦足爲榮可
依前件

衛佐崔蕃授樓煩監牧使判官檢書郎李景

讓授東畿防禦巡官制

勅某官崔蕃等咸因文行自致班序或佐衛蘭錡或
典校蓬山各從所之將展其用夫司牧垆野備禦都
畿所以班馬政而遏寇虞也茲皆重務爾勉贊之可
依前件

李愬李愿薛平王潜馬摠孔戢崔能李翱李

文悅咸賜爵一級并迴授男同制

勅封爵之設在乎賞勸有以褒德有以序勤聳善興
功實由茲道而某官李愬等或望崇台鼎或委重旌
旄爰及藩條共分憂寄有勞於事無怠于心宜䟽爵
以啓封許推恩而及嗣祗受厥命永孚于休可依前
件

故工部尚書致仕杜羔贈右僕射制

勅故某官杜羔生於仁族發爲公器敦厚孝友本平
天性文學政事出於餘力自立朝右藹然素風司諫
平刑駁議廉問凡所踐歷不懈于位以年致政以疾
就第出處進退皆叶時中遽此淪謝惻惻興念夫生
有榮祿歿有寵贈所以極君道厚時風亦聖人有始
卒之義也宜追端揆以申褒飾猶有精爽知吾不忘
可贈尚書右僕射

幽州兵馬使劉悚除左驍衛將軍制

以兄劉
悟奏請

勅某官劉悚夙負氣槩早習騎射才推燕趙之士學
究孫吳之書加以忠厚可當任用况有令弟爲吾信
臣節著艱貞情鍾友愛夫寵寄於外莫重於藩垣委

任於中莫親於禁衛加此一職寵示二人豈不爲榮
季出叔處可左驍衛將軍

前幽州押衙瀛州刺史劉令璆除工部尚書

致仕制

勅某官劉令璆勲伐之家弓裘之嗣嘗修戎職亦領
郡符迨此遲暮知有止足夫壯而奮發以忠事國老
而知退以道安身人所難能理宜嘉尚俾超崇秩以
寵高年可工部尚書致仕

盧衆等除御史評事制

勅幽州節度判官盧衆等幽薊重鎮盧龍舊軍是吾
北門委在上將實資寮佐以濟謀猷爾等或參務戎
旃戈專司奏記俱因事任各展才能而御史府官廷

...吏用申褒獎以勸忠勤勉奉元戎佇成嘉績

張偉等一百九十人除常侍中丞賓客詹事

等制

勅盧龍軍押衙兵馬使什將隨軍某等夫爵賞行於上則忠勞勸於下有國之典其可廢乎吾思蒞師自將及吏合聚衆力鎮寧一方縣以歲年積成勤效今以朝右貴秩官坊清班舉為寵章用申酬獎

梁遂等六人除范陽管内州判司縣尉制

勅盧龍軍節度要籍梁遂等咸以幹能早膺任使各叅軍要同濟戎功言念恭勤宜加優獎都掾邑佐分而命之仍兼舊職勉申來効可依前件

渤海王子加官制

勅渤海王子舉國內屬遣子來朝祇命奉章禮無違者夫又修職貢出錫爵秩茲惟舊典舉而行之

石士儉授龍州刺史制

勅石士儉東川帥涯上言士儉久習武藝兼通吏事可使爲郡責成其功吾聞江油巴夷雜處勿以遐陋而忘緝綏奉法愛人無負知已可龍州刺史

韓萇授尚輦奉御制

勅韓萇局分六尚職奉七輦茲惟優秩列在通班以爾立身頗恭守事甚謹宜有所獎可升於朝可尚輦奉御

孟存授成都府少尹制

勅孟存嘗參劇務亦牧疲人咸有能名得於主帥三

蜀征鎮屯于成都雖有忠賢委爲尹正子於贊修庶
務通統諸曹承而貳之實資亞理勉勤厥職無累所
知可成都府少尹

杜元穎等賜勳制

勅中書舍人杜元穎等有位於朝有勞於事不如慶
賜何勸恪勤宜各策名列于勳籍可依前件

商州壽州將士等賜勳制

勅某官某等夫勳者所以馭貴叙勞充身庇族非因
大慶不降殊恩爾皆委質從軍服勤事國宜按勳籍
分而賜之可依前件

內侍楊志和等授朝散大夫制

勅楊志和等咸分要職列在內司慎靜檢身恭勤守

事宜以章綬命爲大夫佩服寵光爾無失墜可依前件

內常侍趙弘亮加勳制

勅內常侍趙弘亮等列名禁籍祇命宮闈多歷歲時積成勞効宜加勳賞以洽恩榮可依前件

烏行初授衛佐制

勅烏行初重胤之子早稟義方詩禮弓裘式聞不墜賞延之典本勸忠勳環衛之官兼資慎擇非唯父任亦以才升可佐衛曹參軍

烏重胤妻張氏封國夫人制

勅古者夫爲大夫則妻爲命婦況在小君之位未加大國之封豈唯有廢徽章抑亦無勸忠力也某官某

妻某氏以鳴鳩之德作合邦君輔成勲猷馴致爵位
雖從夫貴未授國封今以南陽本邦善地錫爲湯沐
加號夫人茲乃殊榮足光閨闈可封鄧國夫人

白氏文集卷第五十二



臣以章後命命大夫無服者九

內常侍趙弘亮加勳

命官闈多歷

依前

鳥行

鳥行初重

自天文集

以木并

吹簫夫人

無終夫貴未對國持今以甫

莫某力必



白氏文集卷第五十三

申書制誥六

新體凡四十八道

鎮州軍將王怡判官李序先被賊中誅囚並死各贈官及優卹子孫制

勅朕常思鎮冀之間弔伐之際有仗順死義不吾聞者因命弘正列狀以聞而某官王怡等頃陷艱虞思伸忠効或名節將立併命於幽憂或義烈臨奮失身於戮辱履危如虎尾視死如鴻毛若無褒揚何勸天下旣降飾終之命仍如身後之禮追崇延寵有越常倫冀使死節之魂忠憤之骨知我憐憫歿無恨焉怡可贈左僕射序可贈給事中

武寧軍陣亡大將軍李自明贈濠州刺史制

勅王師之討蔡平鄆也自明爲武寧裨將隸于元戎
凡所指蹤必先致命三軍之士于今稱之有勞未圖
無祿早伐生不及賞歿而加恩庶使猛將義夫聞而
相勸曰死而不忘況生者乎可贈濠州刺史

裴弘泰可太府少卿知左藏庫出納制

勅前度支河北權鹽使朝議郎檢校尚書刑部郎中
使持節貝州諸軍事兼權知貝州刺史侍御史充本
州防禦使上柱國賜紫金魚袋裴弘泰九土之貢百
品之貨辨其名物謹其出納常在外府統以上卿宜
求幹敏之才以爲之貳而弘泰頃分權務兼撫郡民
當軍興之時法行政立則受藏之府事繁物殷量其
器能可以專委勉膺是任無替前勞可守太府少卿

知左藏庫出納散官勲賜如故

李昌元可兼御史大夫制

勅通議大夫使持節儀州諸軍事儀州刺史兼御史
中丞上柱國李昌元弓裘令子疆塲勞臣能讀父書
甚識戎事每在戰陣未嘗無功及委蕃條亦聞有政
而知臣者君也賞勞者爵也亞相之秩威重寵崇加
乎爾身以勸能者可兼御史大夫

田頴可亳州刺史制

勅正議大夫前檢校右散騎常侍使持節洛州諸軍
事兼洛州刺史御史大夫充本州團練使上柱國賜
紫金魚袋田頴自別屯將壘專領郡城而能勤恤師
人與之勞逸故臨戎則士樂爲用撫下而衆知嚮方

忠勲既彰能政亦著牧守之選吾所重之譙鄴之間
人亦勞止授爾印綬往勞來之宜推前心佇立後効
可檢校右散騎常侍使持節亳州諸軍事兼亳州刺
史御史大夫本州團練使鎮遏使散官勲賜如故

薛伯高等亡母追贈郡夫人制

勅某夫人某氏等始播婦儀終垂母道教其令子爲
我良臣而皆茂著才名榮居爵位永言聖善宜及顯
揚俾追啓邑之封式表統家之訓可依前件

李佑授晉州刺史制

勅郡守之官與吾共理下之安否繫乎其人必稽前
功方降是命某官李佑夙負材器累經任用常領軍
郡頗著政聲而平陽舊都近罷征鎮土疆事物旣廣

且殷籍爾良能爲予撫字夫均其征役簡其科禁謹
身省事以臨其人而人不安未之有也往弘是道以
康晉人可依前件

武寧軍將王昌涉等授官制

勅王昌涉等早以材力召募從軍元和以來南征北
伐咸有勞績著于一時主帥上聞乞加褒賞故以寺
卿憲職序而寵之無棄前功在申後効可依前件

馬摠亡祖母韋氏贈夫人制

勅某官馬摠亡祖母韋氏播茲懿範貽厥嘉謀施及
孝孫實居貴仕將明餘慶其在追榮不唯陞裕後昆
抑亦光昭幽壤宜降封丘之命以慰令伯之心可贈
某夫人

路貫等授桂州判官制

勅藩隅之重委以侯伯軍府之要掌在賓寮貫等以
文行修身以智謀從事佐廉問澄清之務撫孽夷錯
雜之人俾其又安實在叅贊宜及寵命以光所從可
依前件

駙馬都尉鄭何除右衛將軍制

勅周設七萃漢列八屯皆以拱衛王宮肅嚴徼道統
茲騎吏其屬親賢某官鄭何擢秀士林挺質公器以
貞和陶其性以禮樂文其身善積德門慶連戚里况
久踐名職累著聲猷念舊獎能宜加榮寵環列之尹
不易其人俾宣力於爪牙不失親於肺腑可右衛將
軍餘如故

封太和長公主制

勅公主之封號也或以善地或以嘉名立愛展親茲
惟舊典第四女端明成性和順稟教靜無違禮故組
紉有常訓動必中節故環珮有常聲歲茂穠華日新
淑問乃眷肅雍之德俾開湯沐之封可封某公主

宋朝榮加常侍制

勅河東節度都押衙試太子賓客兼御史中丞宋朝
榮嘗因戰功擢領邊郡揆能適用故有轉遷龍樓上
寮衙門右職雖有兼命未表殊恩宜加騎省之榮不
改憲臺之重以茲寵任足報忠勲爾其敬承無隳乃
力可檢校左散騎常侍餘如故

贈陣亡軍將等刺史制

勅故某官某等王師問罪至于淄青爾等同執干戈
親當矢石忠而盡瘁勇而亡身或退卒于師或進歿
于戰俱死王事深惻朕心念捐軀於軍前宜追命于
泉下郡守之貴以示褒榮可依前件

諸道軍將等授官制

勅平齊之役也諸軍指期衆校合戰某官等各輸戮
勇同對勲勤永思積日之勞頗愧踰時之賞故於獎
授有所超遷朝右貴班官坊清秩或參憲職分以命
之庶知我心不忘忠力可依前件

裴度韓弘等各賜一子官并授姪女婿等制
勅某官某等謁廟郊天改元肆眚是爲大慶與衆共
之矧股肱心膂之臣與吾同體延賞任子其可廢乎

爾等或以文藝或以吏職有所修立稟於義方自當

爾等或以文華或以吏職有所修立稟於義方自當
褒升况霑慶澤俾舉展親之典用叶推恩之道猶子
愛婿各命以官爾其敬承無忝朝獎可依前件

入迴紇使下軍將官吏夏侯仕戡等四十人

授卿監賓客諮議衛佐同制

勅某官夏侯仕戡等前命鄭權之入迴紇也爾等參
護使車用祗王命悉心盡力有恪恭跋滯之勤焉宜
以省寺軍衛之班宮坊府邸之列舉爲賓典分以寵
之辨等旌勞於是乎在可依前件

盧昂可監察御史裏行知轉運永豐院制

時王

播奏
請

勅虢州司戶參軍盧昂前負瑕疵事多曖昧今聞修

省善亦昭彰况有大僚同知情狀且明非罪仍舉有才吾信人言遂可其奏爾思自効無辱所知可依前件

張惟素亡祖紘贈戶部郎中制

勅右散騎常侍張惟素亡祖某縣令某德合上玄才終下位命屈於當代慶流於後昆故其孝孫實登貴仕經曰無念爾祖詩曰貽厥孫謀此言孫之謀能顯揚其先祖之德能垂裕于後也不追榮於列宿曷旌德於太丘可贈戶部郎中

興州刺史鄭公達授王府長史李循授興州刺史同制

勅鄭公達等或以行稱或以才舉進修所致班秩不

卑改命序遷各適其用且乘朱輪於郡邸曳長裾於

早改命序遷各適其用且乘朱輪於郡邸曳長裾於
王門士子名宦至斯亦不爲不遇也立朝案部各敬
爾官可依前件

權知陵州刺史李正卿正除刺史制大夫

勅審材之要考察爲先吾之於人試可乃用李正卿
頗闕吏道因假郡符畏法愛人善於其職夫速旌其
能則吏勸久於其政則化成未可轉遷就加真秩副
吾知獎無怠始終可陵州刺史

知渭橋院官蘇洎授員外郎依前職前進士

王績授校書郎江西巡官制

勅某官蘇洎嘗以幹良分領劇務受任稱職主者上
聞績既有成賞安可闕前進士王績亦以藝學籍名

太常著其令聞及此慰薦一以課進一以才升咸加
班榮同以褒獎臺官校職爾各欽承可依前件

湖南都押衙監察御史王瓘可柳州司馬依

舊職制

勅某官王瓘郡司馬之官秩祿頗厚凡在戎行有軍
課者多兼命以優寵焉而瓘以鞭弭橐鞬從事征鎮
前後主帥咸稱有功宜加新命仍率舊職蓋欲旌往
勞而責來効也爾其勉之可兼柳州司馬

安南告捷軍將黃士儵授銀青光祿大夫試

殿中監制

勅某官黃士儵戎首來降陪臣告捷服勤靡盬將命
無違宜以恩榮獎其勞効貴階崇秩兼而寵之可儵

前件

王鎰可刑部員外郎制

勅刑曹郎鞅朕詔執事擇可以善於其職者而殿中侍御史王鎰自居殿中能察非法連鞠度獄多協平允加以溫敏靜專可當是選一歲之獄決在秋冬今方其時宜敬乃職

京兆府司錄叅軍孫簡可檢校禮部員外郎

荆南節度判官浙東判官試大理評事韓欽可殿中侍御史巡官試正字晁朴可試協律郎充推官同制

勅某官孫簡等凡使府之制量職之輕重以命官揆時之遠近以進秩俾等襄有常序遷次有常程勞逸

均而名分定矣簡自登憲司佐相幕府暨糾天府皆有可稱而飲等亦以文學發身謀畫效用荆陽浙右實籍賓寮况今之公卿大夫皆由此塗出慎爾職事爾無自輕可依前件

冀州奏事官田練可冀州司馬兼殿中侍御

史制

勅某官田練幹敏立身公勤濟事奉州將之手疏達軍人之血誠念其忠勞宜有寵擢假憲名於殿內遷郡秩於治中茲謂兼榮爾其敬受可依前件

薛常翹可邢州刺史本州團練使制

勅新授深州刺史薛常翹平蔡之役常領偏師實立勲勞遂膺寵任今屬方隅多故將守用能且以翹之

長材居邢之要地故命魚符換郡能載移轅夫事至

長材居邢之要地故命魚符換郡熊軾移轅夫事至而功成時來而節見此忠良之事業也爾其念之哉可依前件

牛元翼可檢校左散騎常侍深州刺史御史

大夫制

勅某官兼御史中丞權知深州事牛元翼命官之要凡試吏者必俟成效然後即真而元翼有理戎之才扞城之畧權領軍郡能修武經士樂人安厥有成績是用假威臺憲真拜郡符仍以金貂示其兼寵吾聞忠臣立節烈士墜名其要無他得時而已勉竭才力副予斯言可依前件

王衆仲可衡州刺史制

勅前虔州刺史王衆仲聚學修身由文飾吏累經任
使頗著良能前牧南康亦聞有政宜新印綬載領藩
條而衡湘之間蠻越雜處無以俗陋不慎乃事無以
地遠而怠厥心副吾陟明俟汝奏課可依前件

田盛可金吾將軍勾當左衛事制

勅右金吾衛將軍田盛夫仕官至執金吾古今所榮
重也而盛生勲德門有文武略居貴介而無佚領誰
何而有勞言念徼巡之功宜及轉遷之命處左攝事
以表使能可依前件

陳楚男王府諮議參軍君賞可定州長史兼

御史軍中駢使制

勅某官陳君賞夙承義訓幼有令聞專繼弓裘之名

通知軍旅之事因仍憲職兼佐郡符敬服寵章勉從
任使

崔承寵可集州刺史

勅太子左諭德崔承寵早登班級亟換星霜自陳力
於貴朝屢奉辭於外國職因事博績以勞成就列官
坊既申贊論之美分符郡邸佇聞刺舉之能宜勵公
心祗承寵命

前貝州刺史崔鴻可重授貝州刺史制

勅前貝州刺史崔鴻嘗牧貝丘能修其職及辭印綬
頗有去思相時之宜從人之望俾換新命再臨舊邦
况聞貯蓄時材諳詳物務而方州思理侯伯薦能勤
勤爲政之心勿忝知人之舉

前吉州刺史李繁可依前吉州刺史制

勅前吉州刺史李繁累奉藩條皆奏課第故移縉雲之政俾牧廬陵之人雖降璽書未臨郡邸屬魚章改造熊軾追還事既謀新職宜仍舊勉率分憂之任庶成來暮之誼

瀛漢州都虞萬重皓可坊州司馬制

勅某官萬重皓嘗資武力早備戎行頗歷艱虞亦聞勤効而洛隅未靖遷轉從宜言念前勞宜加優秩可坊州司馬

崔墉可河南府法曹參軍制

勅鄆曹觀察判官監察御史裏行崔墉文行飾躬公清奉職士林推美藩府薦能軍旅之間久資其用忠

勤之後不殞其名宜拔才於功臣俾試吏於府掾可

勤之後不殞其名宜拔才於功臣俾試吏於府掾可
依前件

前河陽節度使魏義通授右龍武軍統軍前
泗州刺史李進賢授右驍衛將軍並檢校
常侍兼御史大夫制

勅文武之才內外迭用軍國之任出入遞遷斯所以
優勲賢而均勞逸也某官魏義通以戎功積久榮委
旌旄某官李進賢以軍課居多寵分符竹各勤其職
咸用所長是以河陽三城鎮靜而不擾濱一郡緝
理而有勞我有禁軍爾宜分領親信則倚爲心膂動
用則張爲爪牙苟非其人不付此任咸假貂蟬之貴
仍兼憲職之榮勉哉二臣無替一志可依前件

李玄成等授官制

勅黔州觀察使兼度支使李玄成等或蘊蓄能才咨
謀是藉或分領劇務課績有成並可奏書各遷憲職
勉勤乃事無忝所知可依前件

馬摠准制追贈云父請迴贈云祖制

勅夫積善者慶鍾于後顯揚者光昭于先而摠貴爲
邦君賢爲國士荷貽謀之訓用率義之文上獻表章
有所陳乞朕念其祖德褒以臺郎所以復陳寔必興
之言慰范喬泣涕之恩庶使幽顯兩無恨焉可贈某
官

權知朔州刺史樂璘正授兼御史中丞制

勅樂璘專習武經旁通吏道試補郡守以觀其能連

帥上聞果副所舉夫審官之要在因其所長而任之

帥上聞果副所舉夫審官之要在因其所長而任之則政速成而化易就也才既試可官宜即真何以寵之就加憲職可朔州刺史兼御史中丞

神策軍推官田疇加官制

勅田疇官列環衛職參禁軍慎檢有聞恭勤無怠顧是勞効別當轉遷郡佐官寮以示兼寵

裴敞授昭義軍判官裴倖授義成軍判官各轉官制

勅裴敞等昭義義成今之重鎮實藉賓介以參謀猷而二帥皆勤於奉公精於辟士度才而授職循序而請官頗合所宜咸可其奏可依前件

雲州刺史高榮朝除太子賓客河東都押衙

制

勅高榮朝常領銳師入攻堅寇因累獎賞位至專城
才有所長宜遷戎職功不可忘兼進榮班勉事元戎
無替勞効

韋綬等賜爵制

勅韋綬等去年春夏同奉寢困事集禮成副吾哀敬
宜加封爵以報恪勤可依前件

烏重明等贈官制

勅故某官烏重明等夫生樹功勤歿加褒飾有國之
常典也重明等在興元初常執勤于奉天策勲為定
難無祿即代有勞未圖星歲屢遷光塵不昧聞鞞之
念予心曷忘俾慰幽泉各追顯秩可依前件

羽林龍武等軍將士各加改轉制

羽林龍武等軍將士各加改轉制

勅夫軍衛警則內外嚴爵賞明則忠勤勸爾等咸以材力列于禁營屬去年以來屢陳儀仗雖加賜與未荅勤勞因詔有司舉行賞典吾匪虛授爾宜敬承文武班資各從序進可依前件

新羅賀正使金良忠授官歸國制

勅新羅使倉部郎中金良忠等朕以文明御時以仁信柔遠聲教所及駿奔而來况溟漲一隅舟航萬里爾慕我化我圖爾勞隨其等倫命以寵秩無替前効永爲外臣可依前件

白氏文集卷第五十三

白氏文集卷五十三

初高梁朝常領使節今故堅定國軍其位至尊然

未為林君百刻前抄功不可忘意遠榮華也

爾慕奔外好圖爾於朝拜奉命命以竇者無替爾校

計柔豉蒸燒四不刺然而來其燕一則舟旅萬里

飲海擊與會

且加封爵

左班資各

登禮也凶臨夜作樂有賞世吾

林氏依主禁營遷去羊心來襲刺射射擊此照與未

謝來軍謝營限內以難籍賞限限忠謹博爾樂知以

林龍左將軍殊士谷依如轉備

白氏文集卷第五十四

翰林制誥一

擬制附凡
三十四道

除裴垪中書侍郎同平章事制

門下朕聞后德惟哲臣德惟良在太宗時實有房杜
贊貞觀之業在玄宗時實有姚宋輔開元之化咸克
佑我烈祖格于皇天朕祇奉丕圖懋繼前烈思欲貞
百度和萬邦建中于人垂拱而理永惟房宋之化寤
寐求思至誠感通上帝眷祐果賴良弼輔予一人正
議大夫行尚書戶部侍郎上柱國賜紫金魚袋裴垪
器得天爵文爲國華行有根源詞無枝葉忠敬恭順
貫之以誠心方潔貞廉輔之以通識玉立不倚金扣
有聲洎內掌綸言密叅樞務巖重有大臣之體溫雅

秉君子之文每獻納之時動有直氣當顧問之際言
無隱情遠圖是經大事能斷匡予不逮時乃之功及
領地官且司邦賦會計務劇出納事殷投利刃而皆
虛委焚絲而必理歷試已久全才益彰宜登中樞以
副僉望夫宰輔者下執邦柄上代天工爲國著龜注
人耳目爾尚降乃德以親百姓廣乃志以序九流匡
朕心以清化源從人欲以致和氣予欲宣力汝爲股
肱予欲詢謀汝爲心膂予違望于汝弼勿謂不從汝
言逆于朕心必求諸道獨立勿懼直躬而行明聽斯
言敬踐乃位嗚呼罔俾房宋專美于前可中書侍郎
同中書門下平章事散官勳賜如故主者施行

自
除段祐檢校兵部尚書右神策軍大將軍制

明下爲君之心惟功勞是念有國之典以賞勳爲先

門下爲君之心惟功勞是念有國之典以賞勸爲先
其有輯睦師徒保綏黎庶盡動王之節建護塞之勲
則宜進以官常委之軍要兼又武之秩叅內外之榮
斯所以彰念功而明懋賞也曰鎮北庭行軍兼涇原
等州節度支度營田觀察處置等使光祿大夫檢校
工部尚書使持節涇州諸軍事涇州刺史兼御史大
夫上柱國鴈門郡開國公段祐卓膺事任累著公忠
名因義聞位以勤致自分戎閫實控塞門明舉武經
大修邊務士卒有勇保障無虞虜不近邊農皆狎野
展執珪之勤禮瀝戀闕之深誠方圖爾勞且遂其志
夫六官庇職大司馬列于前二翼分師上將軍處其
右長夏官以率屬領環衛而拱宸苟非信臣安可兼

委嘉乃實効副予虛求將慎重其腹心宜進登於喉
舌敬服休命勉揚令圖可檢校兵部尚書右神策軍
大將軍知軍事散官勲封如故主者施行

除趙昌檢校吏部尚書兼太子賓客制

門下王者以尚齒尊賢爲禮以念功任舊爲心况文
武之才有以兼備則中外之職所宜迭居所以寵舊
勲而優耆德者也前荆南節度管内支度管田觀察
處置等使金紫光祿大夫檢校兵部尚書兼江陵尹
上柱國天水郡開國公趙昌聚學飾身修誠致用久
膺事任累著勲猷統護交州威惠之聲克振鎮臨南
海撫循之政有經自移部荆門馳心魏闕增修職貢
益勵忠勤爰舉寵章用旌茂績夫望優四皓然後能

調護春闈才冠六卿然後能紀綱會府惟爾年德足
尚可以周旋其間宜增喉舌之榮以崇羽翼之任服
我休命其惟懋哉可檢校吏部尚書兼太子賓客散
官勲封如故主者施行

除鄭綱太子賓客制

門下王者重輔弼之任明進退之宜見可即升知否
則捨茲朕所以推誠不惑與物無私者也銀青光祿
大夫守門下侍郎同中書門下平章事兼弘文館大
學士上柱國陽武縣開國侯鄭綱早以令聞入叅禁
署永惟勤績出授台司期爾有終匡予不逮歲月滋
久謀猷寢微罔清淨以慎身每因循而保位旣垂素
履且鬱皇猷宜副羣情罷茲樞務朕以其久居內職

百集五十四
累事先朝思厚大臣貴全終始俾就優閒之秩用申
寬大之恩可太子賓客散官勲封如故主者施行

加程執恭檢校尚書右僕射制

門下職叅揆務權揔戎麾必惟其人乃授斯柄自非
望崇垣翰功著旂常則何以副儀形之求稱節制之
任我有休命爾其敬■銀青光祿大夫檢校兵部尚
書使持節滄州諸軍事兼滄州刺史御史大夫橫海
軍節度支度營田滄景等州管内觀察處置等使上
柱國邢國公食邑三千戶程執恭義勇立身忠懇成
性聚爲事業發爲勲猷歷事先朝久專外闔殿邦而
山岳比鎮奉國而金石爲心動修武經居有循化洎
執珪入覲班瑞言旋忠懇內激於心誠恭順外形於

詞氣爰舉疇庸之典稍增命秩之榮方圖前勞且有

詞氣爰舉疇庸之典稍增命秩之榮方圖前勞且有
後命朕思安封域望在勲賢任既切於腹心位猶輕
於喉舌以守土勤王之効雖進官封念來朝述職之
忠未加寵數特升右揆俾在中樞勉終永圖無替成
績可檢校右僕射餘並如故

除王似檢校戶部尚書充靈鹽節度使制

四年

六月十三日進

門下靜邊之要選將為先夫有統馭之才然後授以
節制之任有撫備之略然後鎮以夷夏之衝期乎攘
遏寇虞慎固封域今予命爾時謂得人開府儀同三
司檢校刑部尚書兼右衛上將軍寧塞郡王食實封
二百五十戶王似忠厚立誠果斷効用慎始終而行

有枝葉踐夷險而道無磷緇早練武經果從軍職頃
逢多壘實佐元戎節著臨危功叅定難位由勞致名
以忠聞自列六卿且司七萃星霜屢變金石彌堅宜
申命於北轅俾遏戎於南牧進地官以崇新命極勲
秩以褒舊功中簡朕心外諧僉議况五原重鎮諸夏
長城修戎政莫先於威聲牧邊民莫尚於惠實師雜
昆夷之悍訓必在和地爲獯虜之鄰撫宜以信勉率
是道徃分朕憂歲時之間期於報政委望斯在爾其
聽之可檢校戶部尚書兼靈州大都督府長史御史
大夫充朔方靈鹽定遠城節度使知節度事管内支
度營田觀察處置押蕃落等使仍賜上柱國散官實

如故主者施行

除閻巨源充邠寧節度使制

四年十月十一日進

門下華夷要地實爲蕃漢鈇鉞重柄必授忠賢况乎犄角諸軍金湯中夏有坐甲護邊之旅任切於拊循有引弓犯塞之虞寄深於備禦內作心腹外張爪牙苟非信臣不在茲選奉天定難功臣開府儀同三司檢校尚書右僕射兼羽林軍統軍御史大夫上柱國定襄郡王食邑一千三百戶閻巨源備知虜態明練兵符永惟頗牧之能宜授邠邠之寄長南宮而遷左揆壯西郊而委中權旣圖前勞且佇來効於戲千聯之帥可以觀政萬夫之長可以樹勲勉弘令猷副我休命可檢校尚書左僕射使持節邠州諸軍事兼邠州刺史御史大夫充邠寧慶等州節度管內支度

營田觀察處置等使功臣散官勲封並如故主者施

行

授吳少陽淮西節度留後制

三月十九日

門下議事以制擇善而行是適變通庶臻康濟此王

者所以弘德而息人也况闔外重寄淮右成師建有

德以統藩方擢有才以領留府仰惟令典今舉行之

彰義軍馬軍先鋒兵馬使正議大夫檢校右散騎常

侍使持節申州諸軍事申州刺史兼御史大夫會稽

郡王吳少陽忠勞許國貴介成家蓄武略於韜鈴宣

吏能於符竹屬元戎既歿謀帥其難朕將選衆以升

試可而用推掌戎務已逾歲時而能和輯師人勤修

土貢布寬簡有恒之政動悅人情守恭順不踰之心

靜侯君命有嘉大節可假中權宜進列於召單

靜俟君命有嘉大節可假中權宜進列於貂蟬俾增
威於貔武仍加勲秩式茂寵章嗚呼重觀其能我故
委之留事載佇其効爾宜勉於後圖敬思是言往率
乃職可銀青光祿大夫檢校左散騎常侍依前兼御
史大夫使持節蔡州諸軍事權知蔡州刺史充彰義
軍節度管内支度營田申光蔡等州觀察處置等使
留後仍賜上柱國封如故主者施行

除程執恭檢校右僕射制

七月十二
日夜進

門下臣之節極乎忠功君之柄先乎爵賞欲忠者之
克懋也故爵有加等欲功者之速勸也故賞不逾時
古先哲王實用茲道今我命爾因其舊章橫海軍節
度支度營田滄景等州觀察處置等使起復冠軍大

將軍左金吾衛大將軍員外置同正員檢校兵部尚
書使持節滄州諸軍事兼滄州刺史御史大夫上柱
國邢國公程執恭業傳將略名在勲籍蘊天爵以修
已忠孝兩全竭臣節而事君夷險一致紀綱我列郡
節制我成師動揚休聲靜著茂實自合符徵旅奔命
出疆暴露歷於三時供億出於二郡整衆而身作師
律伐謀而心爲戰鋒服金革而無辭當矢石而有勇
雨晦識雞鳴之信風高見隼擊之威遠略旣申茂勲
方集朕以恒陽之衆蠢爾無知毆彼生人致之死地
每一念至惻然久之與其傷和而濟功曷若含垢而
修德旣罷師旅爰圖勤勞効且居多賞宜從重俾自
夏官之長特升右揆之崇獎忠勸功於是乎在承我

夏官之長特升右掖之
休命爾其欽哉可檢校尚書右僕射餘並如故主者
施行

除郎官分牧諸州制

漢宣帝云與我共理者其惟良二千石乎誠哉是言
朕每三復安得循吏副吾此心今之臺郎一時妙選
嘗經任歷率有才用雖典曹庀事其務非輕而卹隱
分憂所寄尤重是用並命分牧吾人歲時之間期於
報政戶部郎中某可某州刺史兵部員外郎某可某
州刺史云云朕高懸爵賞佇期酬効咨爾夙夜其念
之哉無俾龔黃專美前代

除張弘靖門下侍郎平章事制

夫佐佑天子燮理陰陽平章法度登進賢哲外撫夷

狄內安元元使百官修其職一物不失其所此宰相
之任也朕思得良弼馴致此道咨予命汝其殆庶乎
某官張弘靖惟乃祖乃父代居相位咸有成績書于
旂常爾有忠正恭肅文以禮樂日濟其美振揚家聲
一時之人謂之才子亟登清貫益著令聞洎出刺陝
部移鎮蒲坂政不苛細甚得人心寮吏將卒皆樂爲
用清簡之化聞于京師由是鄭風緇衣之好漢庭玄
成之美朝望時議翕然與之人謀旣同朕志亦定乃
用登爾于佐輔授爾以大政尚克欽乃嘉命業乃代
官竭其股肱服我前訓嗚呼三代爲相邦家之光爾
其念哉無替乃前人之徽烈

授范希朝京西都統制

風至太白星高謀帥護邊國之大計某官范希朝

嘗聞風至太白星高謀帥護邊國之大計某官范希
朝忠貞勤儉以爲質惠和智勇以爲用一代名將三
朝信臣朕以西邊列鎮三四若有搃統則易成功思
得良帥有威名者并護諸將歲一巡邊乘秋順令揚
其威武則南牧之馬引弓之人知我有備不戰而去
惟可任者無如希朝以爾有朔方之勞有振武之効
力在疆場名聞羗戎惟實與聲皆副是選今拜爾爲
大將尊爾爲司徒節制進退一令諮稟倚望如右可
不慎與可充京西都統

贈吉甫先父官并與一子官制

勅某官李吉甫出入將相迨今七載而能修庶職叙
彝倫毗予一人以底于道夙夜不怠厥功茂焉夫忠

於君者教本於親寵其身者賞延于嗣於是乎有飾
終之命有任子之恩所以感人心而勸臣節也惟茲
舊典可舉而行

除李絳平章事制

昔在堯舜聰明文思尚賴良臣實相以濟况朕薄德
不逮先王是用急疾於求賢置之於左右俾承弼納
誨以匡不逮言雖逆耳必求諸道事苟利人咸可其
奏茲足以宣股肱之力成天下之務歷選多士爰得
良輔乃降厥命其聽之哉某官李絳齋莊嚴重內明
外直進退舉措有大臣體自參內職每備顧問忠謹
之操終然不渝及貳地官專領財賦未逾周月亦有
成績歷試多可人望攸歸俾登中樞無易絳者於戲

爾以文學入仕以正直奉上才膺大用職亦屢遷十年之間位至丞相可以報國在乎匪躬欽哉懋哉無忝朕命

授韓弘許國公實封制

梁宋之交水陸合會人雜難理軍暴難戢因變肆亂往往有焉唯此一方朕常憂慮今有良帥鎮而撫之政立功成宜舉賞典其官韓弘以長材大略作我藩臣本於忠力輔以政理自分閫寄在浚之郊嚴貞師律恭守朝憲訓兵積粟明罰信賞軍和食足禮節並行河南晏如于茲一紀是則有大勳於國有大惠於人會課議功無出其右夫有過人之効則有加等之命古之王者所以賞一人而天下勸者用此道也可

不務乎是用建于上公授之真食以示殊寵以旌殊
績欽我休命子孫其保之

除裴度中書舍人制

司勳郎中知制誥裴度以茂學懿文潤色訓誥體要
典麗甚得其宜施之四方朕命惟允况中立不倚道
直氣平介然風規有光近侍臺郎滿歲班列當要
閣之職所宜真授

除蕭俛起居舍人制

左補闕翰林學士蕭俛頃居諫列職同其憂夙夜孜
孜拾遺左右朕嘉乃志選在內庭自叅密近益見忠
讜始終不替尤足多之記事之官一時清選俾膺是
命以弘勸獎

除崔羣中書舍人制

庫部郎中知制誥翰林學士崔羣端厚和敏飾以文學溫溫忠敬得侍臣之風自列內朝兼司誥命事煩而益密職久而彌精六年于茲勤亦至矣况小大之事常所訪問盡規極慮弘益居多所宜寵以正名式光禁職敬乃嘉命其惟有終

獨孤郁守本官知制誥制

考功員外郎史館修撰獨孤郁爲人沈實敏行寡言粲然文藻秀出於衆累升諫列再秉史筆洎掌功論率以直聞求之周行不可多得而掖垣近職綸閣重選俯詢時議爾宜居之

授沈傅師左拾遺史館修撰制

京兆府鄠縣尉沈傅師庶職之重者其史氏歟歷代
以來甚難其選非雄文博學輔之以通識者則無以
稱命今茲命爾其有旨哉昔談之書遷能修之處之
史固能終之惟爾先父嘗撰建中實錄文質詳略頗
得其中爾宜繼前志率前修無忝爾父之官之職可
左拾遺史館修撰

除許孟容河南尹兼常侍制

昔吳公袁安爲河南尹守皆能以廉平清肅馭吏教
人孰能繼之我有良吏某官許孟容才志甚大言論
甚高在臺閣間藹然公望嘗尹京邑觀其器用臨事
能守當官敢言不吐剛以茹柔不附上以急下政無
煩碎甚合衆心及是轉遷頗有遺愛河洛千里都畿

在焉凡所選任必歸望實考言詢事非爾而誰不忘
舊政可立新績仍以騎省申而寵之

除李程郎中制

隋州刺史李程頃以詞學入叅訓命旋以才用出領
詔條漢東大郡委之共理勵精爲政三年有成中外
序遷朝之彝典尚書郎缺爾宜補之

裴克諒權知華陰縣令制

華陰令卒非選補時調租勉農政不可缺前鎮國軍
判官試大理評事裴克諒久佐本府頗有勤績屬邑
利病爾必周知宜假銅墨試其才理待有所立方議
正名

贈高郢官制

故尚書右僕射高郢立身從事皆有本末在亂不汗
可以言忠守官不撓可以言直以道佐主可以言正
以年致仕可以言禮有一於此人鮮克舉况備四者
不亦君子乎天不憖遺深用軫悼宜加褒贈以旌其
風仍俾善人聞而知勸可贈某官

貶于尹躬洋州刺史制

中書舍人于尹躬其第臯謨賊汗狼藉雖無從坐之
法合當失教之責然以典職詔命恭勤五年我即念
勞爾宜思過俾居近郡茲謂得中

贈裴垫官制

故太子賓客裴垫忠正恭慎佐予爲理事君盡禮徇
國忘身積憂與勞構成疾恙以至淪逝念之惻然頃

屬多故未申禮典永惟哀飾寧忘于公

屬多故未申禮典永惟褒飾寧忘于心今則命數之間宜從加等庶使忠於君者有以勸焉可贈某官

除軍使邠寧節度使制

金方之氣疑為將星王者法天選命豪傑授之以鉞拜為將軍以威西戎以護中夏而倚望若是安可非其人哉某官某出忠入孝仗信抱義行有餘力學劒讀書鬱然將材用兼文武自領軍衛為我爪牙夙夜警巡不懈于位材官知訓環列增勲服勤五年茲為成績可以移用使之守疆邠邠大藩控扼胡虜若得良將則無外虞知臣者君非爾不可仍加副相以重是行勉樹勤勞式光寵擢

除韋貫之平章事制

周宣漢宣繼體之主一得申甫一得魏丙咸克致理
號爲中興朕嗣位以來求監前烈惟是賢俊寤寐求
思歷選周行乃獲時彥宜以政柄舉而授之某官韋
貫之溫重明正國之公器當官必守臨事能斷簡在
朕志迨今累年乃者擢居諫司以觀其直出領符竹
以觀其理煩之劇務以觀其用訪之大政以觀其體
歷試必中衆望允屬倚之爲相僉曰宜哉可中書侍
郎同中書門下平章事夫臣事君以忠后從諫則聖
靡不有始鮮克有終理化不成恒由於此今我與爾
永終是圖雖休勿休以臻其極嗚呼二宣之業吾有
望焉

除拾遺監察等制

渭南縣尉庾敬休等咸文行清茂士之秀者官從吏
列擢在朝行各隨才用分命以職司諫執憲佇有可
稱

除范傳正宣歙觀察使制

古之諸侯三載考績選其賢者命爲長率所以勸功
行而興理化也蘇州刺史范傳正文學政事二美具
焉選自郎署出分符竹江南列郡連領者三所至之
部悉心爲理明諭朝旨恭守詔條謹身省事以臨其
下政簡而速意誠而明吏不能欺人是以息而去思
之嘆來暮之謠徃復有政聞於人聽雖古循吏蔑以
加之朕以陵陽奧壤土廣人庶其地有險所寄非輕
跡其前効可當此選况黜歙之遺愛尚在吳興之新

政方播升車便道足慰人心固當望風自安計日而
理倚注於爾往宜欽哉

邊鎮節度使起復制

執親之喪三年禮也聖人不得已而奪之金革之事
無避權也忠臣不得已而從之某官某握我兵要守
在塞門忠勇威惠合以爲用師人悅附戎虜畏服迨
彼諸部聞其姓名况歲廣屯田日討軍實載陳遠略
方集六勲自罹家艱遽致公政茹荼銜恤已過旬時
而軍旅不可以無帥疆場不可以無主且慮人慢或
生戎心蓋臣節大於孝思王事急於情禮捨輕從重
徇公滅私變而通之正在於此俾加戎秩用護邊封
徃服舊職無違朕命

除任迪簡檢校有僕射制

書曰德懋懋官功懋懋賞此先王所以匡飾天下也
其有忠勞輸于國惠澤及於人高位厚賞朕無所愛
某官任迪簡頃以本鎮元戎來朝俾佐師律實掌留
務屬偏裨不軌誘動軍部亂行忤命至于再三而迪
簡冒白刃於戎首置赤心於人腹挺身誓衆罔不率
逆群情既歸因命爲帥况閭閻蕩枿倉廩匱竭野有
餓殍軍無見糧又能推恩信以結衆心率勤儉以勸
生業士旅悅附流庸思歸周月之間泰然安堵開置
幕府叶和親鄰俾予無憂時乃之力夫爲將守立功
如斯不加爵賞何勸來者建官惟百端揆長之自非
勲賢不在此選以是加等之命寵乃殊常之績俾增

威於閩外仍就拜於軍中爾其欽哉無替厥命

除常侍制

某官某往以強毅剛正見稱於時擢在左曹俾之駁議旋以言動小有過差左遷遠藩亦聞有政雖經三黜僅歷二紀而堅直之氣終然不渝人之所難亦足嘉尚宜可束帶立之于朝正色讜言時有所取俾登西掖仍珥右貂從容前後以備顧問

除裴武太原卿制

聚九州之賦辦百貨之名按其度程謹其出納孰爲主者外府上卿務殷秩崇不易其選某官裴武有通敏之識有倚辯之才以茲器用早膺任使小大之務罔不勵精累有勤績存乎官次而受藏之府國用所

資若非使能何以集事俾陞顯列仍委劇務爾宜率
其官屬欽乃職司會祭藏出入之要修權量平校之
法以遵成式無使改易謹而守之斯為稱職

白氏文集卷第五十四





白氏文集卷

夫以善知左無射也其韜而守之謀為辭類以有通
其為辭類也其類同會茶錄出入之要類對量平效之
不吾非也其類同以樂事也其類同以委陳其類同

白氏文集卷第五十五

翰林制誥二

凡四十三道

杜佑致仕制

勅盡悴事君明哲保身進退始終不失其道自非賢
達孰能兼之司徒同平章事杜佑以長才名略爲國
元臣歷事四朝殆逾三紀出專征鎮爲諸侯帥入贊
台袞爲王室輔嘉猷茂績中外洽聞寵任旣崇勤勞
亦至頃以年登致仕退請懸車方深倚注久未得謝
勉就牽率迨茲累年今抗疏披誠至于數四敦諭頗
切陳乞彌堅期於必遂理不可奪守冲知止佑實有
焉賢哉大夫今古同道宜從優異之命式表褒崇之
禮尚資耆望俾傳東朝可太子太師致仕如天氣晴

和亦任朝謁昔祁奚申叔皆就請老國有大事入議
否臧忠臣愛君豈必在位永觀前事期副茲懷

鄭涵等太常博士制

某官鄭涵等並早以文行久從吏職輩流之間頗爲
淹滯况雅有學識進修不已禮官方缺宜當此選凡
朝廷禮制或損益有宜中外謚議或褒貶不決爾爲
博士皆得正之所任非輕各敬乃事並可太常博士

除韓臯東都留守制

國之都府半在東州未遑時巡方委留鎮非位望崇
盛加之勤舊者則不足以允僉屬而副重寄也刑部
尚書韓臯名德之後鬱然公才正行通規貫于終始
累遷臺府連鎮藩維入修職業出樹風聲故多遺愛

著聞中外况一登朝序殆三十年舊德耆望無居其
右俾又東夏僉以爲然乃加冢卿以示崇寵敬服嘉
命永孚于休可檢校吏部尚書東都留守

中書舍人韋貫之授禮部侍郎制

典郊祀之禮獻賢能之書今小宗伯實蕪二事非直
清明正者不足以處之中書舍人韋貫之沈實賢峻
文以禮樂行成於內移用於官公直之聲滿於臺閣
頃以詞藻選登禁掖秉筆書命時稱得人久積勤勞
宜有遷轉可使典禮以和神人可使考文以第俊秀
儀曹之選僉議所歸往修乃官無替厥問可禮部侍
郎餘如故

薛存誠除御史中丞制

庶官之政得人則舉況中執憲準繩之司所以提振
紀綱端肅內外蓋一職修者其斯任之謂歟給事中
薛存誠選自郎署列于左曹居必靜專言皆讜正章
疏駁議多所忠益可以執憲立于朝端况副相方缺
臺綱是領糾正百官爾得專之夫直而不絞威而不
猛不附上以急下不犯弱以違強率是而行號為稱
職敬服斯令往其懋哉可御史中丞餘如故

前長安縣令許季同除刑部郎中前萬年縣
令杜羔除戶部郎中制

前長安縣令許季同前萬年縣令杜羔等頃自郎署
分宰京邑而長吏待之小乖常禮雖同辭託故動未
得中然遠耻以退道不失正各從免職亦既踰時况

文行政能皆推於衆詢諸侍義且有遷受尚書

文行政能皆推於衆詢諸時議宜有遷授尚書郎缺
方選才良憲部人曹俾膺並命季同可刑部郎中羔
可戶部郎中

京兆少尹辛祕可汝州刺史制

京兆少尹辛祕頃守吳興時逢擾亂安人殄寇節効
可稱出倅戎車入貳京輦亦有政績著于官常今以
汝邠軍郡之大方求良吏委之分憂詢事考能爾當
其選往即乃土以舒吾人可汝州刺史

除李遜京兆尹制

近歲京兆長吏數遷誠不便時抑有其故或鈐鍵不
謹吏緣爲姦或鈎距大煩人受其弊旣非中道皆不
得已而罷之宜求恬智寬猛相濟者親諭斯旨使久

於其職以息吾人浙江東道觀察使御史中丞李遜
十年以來連守四郡或紛擾之際或荒饉之餘威惠
所加罔不和輯賞其殊績擢在大藩自臨會稽一如
舊政况省科禁以便俗通津梁以息征動遵詔條深
副朝旨江南列鎮良帥則多集課程功爾為稱首而
內史之選久難其人今予所求唯爾可使雖表率州
部其委非輕然尹正京師所資尤急宜輟材於浩壤
佇觀政於輦轂望爾有成無替厥命可權知京兆尹

除孔戣等官制

渾金璞玉方圭圓珠雖性異質殊皆國寶也是故能
官人者亦辯而用之諫議大夫孔戣靜專貞白不涉
聲利執言守事無所依違駕部郎中薛存誠廉潔直

方飾以詞藻中立不倚於然風見吏邪員卜王

方飾以詞藻中立不倚介然風規吏部員外郎王涯
端明精實加之以敏懿文茂學尤推於時並歷踐朝
行恪勤官次諫垣郎著藹其休聲宜加公獎擢在近
侍左右禁闥可以同升必能評奏臺議發揚綸誥臨
事有立屬詞可觀各隨所長分命以職祗奉乃事無
替厥猷殲存誠並可給事中涯可兵部員外郎知制
誥

除李建吏部員外郎制

六官之屬選部郎首之歷代以來諸曹郎之中擇其
踐歷久考第高加以有器局律度者遷焉今之選任
亦由是矣兵部員外郎李建文行才理公勤課績可
謂具美宜居厥官歲調方殷勉勤爾事可吏部員外

郎具美且母... 除劉伯芻虢州刺史制

給事中劉伯芻以文雅才名給事左闕實掌駁議再

逾歲時亦謂恪勤宜從遷轉而虢略近郡黎人未康

藉爾良能為予撫字懸賞佇効勉哉是行可授虢州

刺史

刺史

除周懷義豐州刺史天德軍使制

西受降城尤居邊要西戎北虜介乎其間委之郡符

建以戎號將守之遷宜乎得人前汝州刺史周懷義

久列禁衛嘗從征伐又領軍郡率著勤功宜加獎用

可屬憂寄况茲要鎮實扼戎吭掎角諸軍高鑄右地

牧人訓旅兼領非輕無替前勞在申後効可豐州刺

史天德軍使

除某官王某魏博節度使制

師長之選重難其人况河上列城鄴中雄鎮初喪良帥思安衆心若親與仁方膺是命某官王某出忠入孝根乎至性好學樂善出於餘力發自修已施于爲政可以守土可以長人今兩河之間三軍乏帥是用命爾領茲大藩澄清魏風輯理相土爲我垣翰永孚于休徃其欽哉無替厥職可魏博等州節度觀察使除某節度留後起復制

懋勲德者慶鍾于嗣襲忠順者教本於親於是乎有代及之恩有賞延之命所以光子道而激臣節也茲惟舊典可舉而行某官某惟乃祖父勤勞王家威有

忠功書于甲令降及於爾亦克負荷早承義訓又倅
戎麾自罹憫凶能著成敬恭俟朝命靖安人心雖在
幼冲足可嘉獎今屬元戎初喪衆望顛然宜選親賢
以爲統帥留府之事俾爾專之加戎秩以奪哀遷冬
卿以示寵奉揚新命無忘前修爾宜懋哉懸賞佇効
可節度留後檢校工部尚書

除薛平鄭滑節度制

武牢以東至于白馬形勢之地水陸之會宜擇文武
兼備者以爲守臣右衛將軍薛平自司禁旅爲我爪
牙訓整警巡能宣其力嘗使于絕國可謂有勞嘗牧
于大郡亦聞有政况忠厚爲質通明爲用秉吏道之
刀尺襲將門之弓裘可以爲三軍之帥可以理千乘

之賦俾輟才於北落徃節制於東方爾宜式遏四封
輯寧百衆明簡稽以實軍旅信賞罰以勸吏人勉率
乃職無忝厥命仍以冬卿副相兼而寵之可檢校工
部尚書兼御史大夫

除盧士政劉從周等官制

君有舉左史得書之政有關諫官得補之二職者歷
朝之清選也前侍御盧士政嘗在西川時爲從事亂
危潛伏能潔其身前監察御史劉從周頃佐宣城奉
公守政端士之操終然不渝時所稱論並宜甄獎况
學術詞藻見推於衆並命清貫僉以爲宜記事盡規
各佇能効士政可起居郎從周可右補闕

張正一致仕制

前諫議大夫張正一學行器用為時所稱擢居諫官
冀効忠謹雖年齒未暮而衰疾有加所宜願養不可
牽率俾移優秩以從致政可國子司業致仕

張正甫蘇州刺史制

浙右列城吳郡為大地廣人庶舊稱難理多選他郡
二千石之良者轉而遷焉鄧州刺史張正甫自領南
陽僅經三載廉平清簡以臨其人人安政和理行第
一宜以大郡推而廣之用旌前勞且佇來効可蘇州
刺史

崔清晉州刺史制

左司郎中崔清以才良行敏補尚書郎頗積公勤宜
加獎任頃嘗為郡亦聞有政平陽舊壤時謂名藩得

才與能方可共理安人
俗佇有成績可晉州刺史

除柳公綽御史中丞制

中憲之設糾謬懲違一引其綱百職具舉非清與直
不稱厥官諫議大夫柳公綽忠實有常文以詞學介
然端直有古之遺風頃居臺憲累次郎位持平守正
人頗稱之擢首諫司器望益重今副相缺位中司專
席惟有守者可以執憲惟無私者可以閑邪詢事審
官爾當是選光昭新命振起舊章宜一乃心以揚其
職可御史中丞

除田興工部尚書魏博節度使制

馭下安人其道不一或序能以次用或因效以拔才
所命雖殊同歸共理某職某官田興時屬本軍初喪

戎帥亂政咸啓羣心不寧而興列在偏裨奮其義勇
謀成必中事至能斷智略所及指麾所加一軍獲安
百衆附悅連獻章䟽恭俟制命有節有禮朕用嘉之
夫以將材如彼軍情若此允膺不次之舉可貴非常
之功是用寵之冬卿擢爲大將仍以印綬就拜軍中
其敬之哉無墮乃力可檢校工部尚書兼御史大夫
魏博等州節度觀察等使

除鄭餘慶太子少傅制

東朝三少歷代重選不必備位在乎得人吏部尚書
鄭餘慶貞明儉素有古人風發自修身施於爲政出
入中外多歷要重咸有勤績存于官次况動中禮法
學綜儒玄是謂羽儀之臣可居師傅之任輔我元子

爾其勉歟可太子少傅

除裴堪江西觀察使制

江西七郡列邑數十土沃人庶今之與區財賦孔殷
國用所繫茲爲重寄宜付長才同州刺史裴堪素蓄
器幹久經任遇日者資其忠諒入爲諫議大夫藉其
良能出爲左馮翊曾未周歲政立績成區區一郡未
盡其用鍾陵要鎮可以委之夫簡其條章平其賦役
徇公率正以臨其人而人不安未之有也祇服厥命
往修乃官仍兼中憲以示優寵可江西觀察使兼御
史中丞

贈杜佑太尉制

生有爵祿歿有褒贈此王者所以崇哀榮之禮厚君

臣之恩况有輔臣所宜加等某官致仕佑以通濟之
才公忠之節逢時入用爲國大臣外領藩鎮內叅台
鉉積勤盡悴迨過三紀左右于位亦旣八年天不憖
遺奪我元老憫然興歎實軫于懷永言褒榮俾峻禮
命上公之秩用賁幽靈嗚呼錄舊旌勞知予不忘可
贈太尉

除孔戢萬年縣令制

京邑令缺多擇尚書郎有才理者補之兵部員外郎
孔戢自御史府遷夏官之屬凡所蒞職一心奉公在
郎署間稱有名實加以文學緣飾吏能俾宰京劇佇
有成效

除裴向同州刺史制

馮翊之地密邇郊畿分內史之政叅京師之化俾善
所職其在得人京兆少尹裴向器蘊利用學通政事
久試吏治頗著良能累守大郡入亞天府奉上撫下
皆有可稱左輔之重爾膺其選况征賦猶重人庶未
康實望良才與之共治勉副所舉往修厥官可同州
刺史

除武元衡門下侍郎平章事制

朕嗣守丕業迨將十年實賴一二輔臣與之共治故
外鎮方域則仗以爲將有絳侯厚重之質有邴吉寬
大之風自登台司克厭人望頃屬巴蜀軍後人殘權
委節旄俾往鎮撫信及夷貊恩加疲瘵每因利以施
惠不易俗而修教政無苟得人用便安惠茲一方時

乃之績報政既久屬望益深宜歸左輔以叅大政夫
坦然公道可以叙衆才曠然虛懷可以應羣務彌違
救失不以尤悔爲慮進善懲惡不以親讎自嫌用此
輔君足爲名相欽率是道往復乃官可門下侍郎同
中書門下平章事

除李夷簡西川節度使制

征鎮之大實惟蜀川西距于戎南漸于海有重江複
山之險有長轂堅甲之旅水陸交會華夷雜居疇能
治之我有良帥山南東道節度使某官李夷簡以正
事上以簡臨下仗茲器用累當任遇執憲之難也爾
爲臺丞其職甚舉司計之重也爾調邦賦其効可稱
爰資長才出領重鎮自摠符鉞于漢之南專奉詔條

削去敝政均穀籍不一之賦罷舟車無名之征近悅
遠來歸如流水俗用丕變人迄小康三載考功爾爲
稱首進其右秩遷于大藩以均惠乎四方以旌勸乎
羣吏昔文翁明於教化种暲優於政能巴蜀之間遺
美猶在不替前効可以副之佇聞有成用光厥命可
檢校吏部尚書劔南西川節度等使貶重必臨望實

除袁滋襄陽節度使制

漢以二千石之良者入爲公卿周以六官之賢者出
兼侯伯內外之任所命則殊至於治軍國寵忠賢其
致一也戶部尚書袁滋奉上甚勤臨下甚簡安人附
衆尤是所長須資其能移鎮東郡略其科禁緩其征
徭政不滋彰人用休息在部七載績成課高璽書徵

還益聞遺愛老幼遮道事鄰古人朕方勤卹疲民褒
獎循吏累月再命其有旨哉舉鄭滑之政也故旌武
公之美寵以司徒憂襄漢之人也故仗叔子之才委
茲征鎮類能而使其在此乎勉揚厥聲無替前効可
某官山南東道節度等使

歸登右常侍制

近侍之列騎省為貴歷代迄今選任頗重必詢望實
而後命之工部侍郎歸登朴忠沈厚心無詭詐介圭
不飾止水無波澹然自居以致名稱抱此素行歷踐
清貫掌議左掖貳職冬官歲時滋深體望益茂可以
備顧問應對之選列言語侍從之臣冠附貂蟬立之
于右訪諸時論僉以為然可右散騎常侍

李程行軍司馬制

隋州刺史李程頃自周行出分憂寄漢南大郡守之
五年頗著良能宜當選獎况專習文學通知兵事西
南重鎮初委元戎慎選副車爾當此舉三軍之重俾
往貳之仍加憲職以示優寵可御史中丞劔南西川
行軍司馬

李甌虞部郎中制

金州刺史李甌雅有文藝飾以政事早從吏職久領
部符謹慎廉平頗副所任虞曹郎缺命以序遷敬茲
寵名勉守厥位可尚書虞部郎中

牛僧孺監察御史制

河南縣尉牛僧孺志行修飾詞學優長頃對策于庭

其言甚直累從吏職頗謂滯淹訪諸時論宜當朝選
俾升憲府以觀其才可監察御史

裴克諒量留制

華州刺史奏華陰令裴克諒在官清白奉法考秩向
滿其政如初借留三年用觀成績朕方旌求良吏俾
養黎元適副所懷宜可其奏

張聿都水使者制

前湖州長史張聿頃以藝文擢升朝列嘗求祿養出
署外官名不為身志亦可尚喪期既畢班序當遷俾
領水衡以從優秩可都水使者

薛伾鄜坊觀察使制

鄜時延安抵于中部羗夷種落散在其間戎夏雜居

易擾難理宜選寬明之使通知邊

者委以符節而

糾綏之右金吾將軍薛伋服勤戎職練達吏道出入

中外綿歷歲年能一乃心以宣其力自加寵遇再執

金吾徼巡有嚴夙夜匪懈在公若是何用不臧况爲

人沉靜內肅外和按俗守封是其所善宜輟務於誰

何俾宣風於廉察庶乎勞徠諸部綱紀列城奉詔條

以安人叅戎索以訓旅欽承厥命往復乃官仍踐冬

卿式光重寄可檢校工部尚書充鄜坊等州觀察使

韓愈比部郎中史館修撰制

太學博士韓愈學術精博文力雄健立詞措意有班

馬之風求之一時甚不易得加以性方道直介然有

守不交勢利自致名望可使執簡列爲史官記事書

法必無所苟仍遷郎位用示褒升可依前件

李暈安州刺史制

宿州刺史李暈勳闕之門嗣生才略久叅戎衛頗著
勤勞試守列城觀其為政屬汴泗之右創畫州居府
署城池委之經始一日必葺三年有成且聞公勤宜
有遷轉重分憂寄再佇良能往安吾人無忝厥命可
安州刺史

竇易直給事中制

前御史中丞竇易直器質識智厚重間敏文合法要
學通政經累踐臺郎擢司邦憲寬猛舉措甚得其中
官不易方府無留事前因病免今以才遷俾升瑣闥
以備顧問夫制令奏議官獄典章苟有依違皆得駁

正所任不細宜敬乃官可給事中

孟簡賜紫金魚袋制

漢制二千石有政績者就加寵命不即改移蓋欲使
吏久於官人安其化也常州刺史孟簡簡易勤儉以
養其人政不至嚴心未嘗怠曾未再稔績立風行歲
課郡政毗陵為最方求理實獲我心宜加命服以
示旌寵庶俾群吏聞而勸焉宜賜紫金魚袋

盧元輔杭州刺史制

河南縣令盧元輔早以學藝列在周行嘗守商都頗
聞有政再領京縣益見其才江南列郡餘杭為大征
賦猶重疲人未康藉爾登車徃分憂矚勞俸安緝稱
朕意焉懸賞旌能以佇報政可杭州刺史

錢徽司封郎中知制誥制

中臺草奏內庭掌文西掖書命皆難其人也非慎行
敏識茂學懿文四者兼之則不在此選祠部郎中翰
林學士錢徽藹然儒風粲然詞藻績密若玉端直如
弦自叅禁司益播其美貞方敬慎久而彌彰應對必
見於據經奏議多聞於削藁迨今六載其道如初嘉
其忠勤宜有遷擢俾轉郎吏仍叅綸閣茲乃榮獎爾
其敬承可依前件

獨孤郁司勳郎中知制誥制

考功貞外郎知制誥獨孤郁學識文行時論所推選
自外郎擢居右閤綸言樞命既重且推委以發揮甚
聞稱職而端諒忠謹介然自居爲臣若斯足可嘉獎

官當滿歲職亦逾年宜從美遷以光近侍可司勳郎
中知制誥

白氏文集卷第五十五



中臺草奏內庭掌文西掖書命查難其人也非廣行
歌詠放學懿文四者兼之則不在此選祠部郎中餘

不學士錢微
按自參禁司
見於據經天
其忠勤且有
其故承可依

白刃文集卷
有功負外郎知制誥獨孤亦學識文行時論所推選
中映時藉
國堂亦為鄉亦宜平宜并美譽又出











Blue Cyan Green Yellow Red Magenta White 3/Color Black
© The Tiffen Company, 2007
Tiffen Color Control Patches
Centimeters 1 2 3 4 5 6 7 8 9 10 11 12 13 14 15 16 17 18 19
Inches 1 2 3 4 5 6 7 8

